

三
國
志

一五



杜周杜許孟來尹李譙郤傳第十二

蜀書

國志四十二

杜微傳

杜微字國輔梓潼涪人也少受學於廣漢任安
劉璋辟爲從事以疾去官及先主定蜀微常稱
龍耳閉門不出建興二年丞相亮領益州牧選迎
皆妙簡舊德以秦宓爲別駕五梁爲功曹微爲
主簿微固辭輦而致之既至亮引見微微自陳
謝亮以微不聞人語於坐上與書曰服聞德行
饑渴歷時清濁異流無緣咨覲王元泰李伯仁

王文儀楊季休丁君幹李永南兄弟文仲寶等
每歎高志未見如舊猥以空虛統領貴州德薄
任重慘慘憂慮朝廷主公今年始十八天姿仁
敏愛德下士天下之人思慕漢室欲與君因天
順民輔此明主以隆季興之功著勲於竹帛也
以謂賢愚不相爲謀故自割絕守勞而已不圖
自屈也微自乞老病求歸亮又與書荅曰曹丕
篡弑自立爲帝是猶土龍芻狗之有名也欲與
羣賢因其邪僞以正道滅之怪君未有相誨便
欲求還於山野丕又大興勞役以向吳楚今因

不多務且以境勤農育養民物並治甲兵以待其挫然後伐之可使兵不戰民不勞而天下定也君但當以德輔時耳不責君軍事何爲汲汲欲求去乎其敬微如此拜爲諫議大夫以從其志五梁者字德山犍爲南安人也以儒學節操稱從議郎遷諫議大夫五官中郎將

周羣傳

周羣字仲直巴西閬中人也父舒字叔布少學術於廣漢楊厚名亞董扶任安數被徵終不詣時人有問春秋讖曰代漢者當塗高此何謂也

舒曰當塗高者魏也鄉黨學者私傳其語羣少
受學於舒專心候業於庭中作小樓家富多奴
常令奴更直於樓上視天災纔見一氣即白羣
羣自上樓觀之不避晝夜故凡有氣候無不見
之是以所言多中州牧劉璋辟以爲師友從事
續漢書曰建安七年越雋有男子化爲女人時羣言哀帝時亦
有此將易代之祥也至二十五年獻帝果封于山陽十二年十
月有星孛于鶉尾荊州分野羣以爲荊州牧將死而失土明年
秋劉表卒曹公平荊州十七年十二月星孛于五諸侯羣以爲
西方專據土地者皆將失土是時劉璋據益州張魯據漢中韓
遂據涼州宋建據枹罕明年冬曹公遣偏將軍擊涼州十九年獲
宋建韓遂逃于羌中被殺其年秋璋失
益州二十年秋曹公攻漢中張魯降

校尉先主欲與曹公爭漢中問羣羣對曰當得

其地不得其民也若出偏軍必不利當戒慎之

時州後部司馬蜀郡張裕亦曉占候而天才過

羣

裕字南和

諫先主曰不可爭漢中軍必不利先主

竟不用裕言果得地而不得民也遣將軍吳蘭
雷銅等入武都皆沒不還悉如羣言於是舉羣

茂才裕又私語人曰歲在庚子天下當易代劉

氏祚盡矣主公得益州九年之後寅卯之間當

失之人密白其言初先主與劉璋會涪時裕爲

璋從事侍坐其人饒鬚先主嘲之曰昔吾居涿

縣特多毛姓東西南北皆諸毛也涿令稱曰諸

毛繞涿居乎裕即荅曰昔有作上黨潞長遷爲
涿令涿令者去官還家時人與書欲署潞則失
涿欲署涿則失潞乃署曰潞涿君先主無鬚故
裕以此及之先主常銜其不遜加忿其漏言乃
顯裕諫爭漢中不驗下獄將誅之諸葛亮表請
其罪先主荅曰芳蘭生門不得不鉏裕遂弃市
後魏氏之立先主之薨皆如裕所刻又曉相術
每舉鏡視面自知刑死未嘗不撲之于地也羣
卒子巨頗傳其術

杜瓊傳

杜瓊字伯瑜蜀郡成都人也少受學於任安精
究安術劉璋時辟爲從事先主定益州領牧以
瓊爲議曹從事後主踐阼拜諫議大夫遷左中
郎將大鴻臚太常爲人靜默少言闔門自守不
與世事蔣琬費禕等皆器重之雖學業入深初
不視天文有所論說後進通儒譙周常問其意
瓊答曰欲明此術甚難須當身視識其形色不
可信人也晨夜苦劇然後知之復憂漏泄不如
不知是以不復視也周因問曰昔周徵君以爲
當塗高者魏也其義何也瓊答曰魏闕名也當

塗而高聖人取類而言耳又問周曰寧復有所
怪邪周曰未達也瓊又曰古者名官職不言曹
始自漢已來名官盡言曹吏言屬曹卒言侍曹
此殆天意也瓊年八十餘延熙十三年卒著韓
詩章句十餘萬言不教諸子內學無傳業者周
緣瓊言乃觸類而長之曰春秋傳著晉穆侯名
太子曰仇弟曰成師師服曰異哉君之名子也
嘉耦曰妃怨耦曰仇今君名太子曰仇弟曰成
師始兆亂矣兄其替乎其後果如服言及漢靈
帝名二子曰史侯董侯既立爲帝後皆免爲諸

矣與師服言相似也先主諱備其訓具也後主
諱禪其訓授也如言劉已具矣當授與人也意
者甚於穆矣靈帝之名子後官人黃皓弄權於
內景耀五年宮中大樹無故自折周深憂之無
所與言乃書柱曰衆而大期之會具而授若何
復言曹者衆也魏者大也衆而大天下其當會
也具而授如何復有立者乎蜀既亡咸以周言
爲驗周曰此雖己所推尋然有所因由杜君之
辭而廣之耳殊無神思獨至之異也

許慈傳

許慈字仁篤南陽人也師事劉熙善鄭氏學治
易尚書三禮毛詩論語建安中與許靖等俱自
交州入蜀時又有魏郡胡潛字公興不知其所
以在益土潛雖學不沾洽然卓犖彊識祖宗制
度之儀喪紀五服之數皆拍掌畫地舉手可采
先主定蜀承喪亂歷紀學業衰廢乃鳩合典籍
沙汰衆學慈潛並爲博士與孟光來敏等典掌
舊文值庶事草創動多疑議慈潛更相克伐謗
讟忿爭形於聲色書籍有無不相通借時尋楚
撻以相震懾撻虛晚反其矜己妬彼乃至於此先主

愍其若斯羣僚大會使倡家假爲二子之容倣其訟閱之狀酒酣樂作以爲嬉戲初以辭義相難終以刀杖相屈用感切之潛先沒慈後主世稍遷至大長秋卒

孫盛曰蜀少人士故慈潛等並見載述

子勛傳其業

復爲博士

孟光傳

孟光字孝裕河南洛陽人漢太尉孟郁之族

續漢

書云郁中常侍孟貴之弟

靈帝末爲講部吏獻帝遷都長安遂

逃入蜀劉焉父子待以客禮博物識古無書不覽尤銳意三史長於漢家舊典好公羊春秋而

譏呵左氏每與來敏爭此二義光常譏譏謹昨

譏音交反謹音休
表反昨音徂格反

先主定益州拜爲議郎與許慈

等並掌制度後主踐昨爲符節令屯騎校尉長
樂少府遷大司農延熙九年秋大赦光於衆中
責大將軍費禕曰夫赦者偏枯之物非明世所
宜有也衰弊窮極必不得已然後乃可權而行
之耳今主上仁賢百僚稱職有何旦夕之危倒
縣之急而數施非常之恩以惠姦宄之惡乎又
鷹隼始擊而更原有罪上犯天時下違人理
老夫耄朽不達治體竊謂斯法難以經久豈具

瞻之高美所望於明德哉禕但顧謝跼蹐而已

光之指摘痛癢多如是類故執政重臣心不能

悅爵位不登每直言無所回避爲代所嫌太常

廣漢鐔承

華陽國志曰承字公文歷郡守少府

光祿勳河東裴雋等

年資皆在光後而登據上列處光之右蓋以此

也

傳暢裴氏家記曰雋字奉先魏尚書令潛弟也雋姊夫爲蜀中長史雋送之時年十餘歲遂遭漢末大亂不復得還

既長知名爲蜀所推重也子越字令緒爲蜀督軍蜀破還還洛陽拜議郎後進文士祕書郎

郤正數從光諮訪光問正太子所習讀并其情

性好尚正荅曰奉親虔恭夙夜匪懈有古卅子

之風接待羣僚舉動出於仁慈光曰如君所道

皆家戶所有耳吾今所問欲知其權略智調何如也正曰世子之道在於承志竭歡既不得妄有所施爲且智調藏於曾懷權略應時而發此之有無焉可豫設也光解正愼宜不爲放談乃曰吾好直言無所回避每彈射利病爲世人所譏嫌疑省君意亦不甚好吾言然語有次今天下未定智意爲先智意雖有自然然不可力彊致也此諸君讀書寧當倣吾等竭力博識以待訪問如博士探策講試以求爵位邪當務其急者正深謂光言爲然後光坐事免官年九十餘

卒

來敏傳

來敏字敬義陽新野人來歙之後也父豔爲漢

司空

華嶠後漢書曰豔好學下士開館養徒衆少歷顯位靈帝時位至司空

漢末大亂敏

隨姊夫奔荊州姊夫黃琬是劉璋祖母之姪故

璋遣迎琬妻敏遂俱與姊入蜀常爲璋賓客涉

獵書籍善左氏春秋尤精於倉雅訓詁好是正

文字先主定益州署敏典學校尉及立太子以

爲家令後主踐阼爲虎賁中郎將丞相亮住漢

中請爲軍祭酒輔軍將軍坐事去職

見集有敏對將軍來敏對

上官顯言新入有何功德而奪我榮實與之邪諸人共憎我何故如是敏年若狂時生此怨言皆成都初定議者以爲來敏亂羣先帝以新定之際故遂舍容无所礼用後劉子初選以爲太子家令先帝不悅而不忍拒也後主即位吾聞於知人遂復擢爲將軍於酒筵議者之審見背先帝所疏外自謂能以敏屬薄俗帥之以義今既不能表退職使閉門思愆

亮卒

後還成都爲大長秋又免後累遷爲光祿大夫復坐過黜前後數貶削皆以語言不節舉動違常也時孟光亦以樞機不慎論議干時然猶愈於敏俱以其著宿學士見禮於世而敏荆楚名族東宮舊臣特加優待是故廢而復起後以敏爲執慎將軍欲令以官重自警戒也年九十七景耀中卒子忠亦博覽經學有敏風與尚書向

充等並能協贊大將軍姜維維善之以爲參軍

尹默傳

尹默字思潛梓潼涪人也益部多貴今文而不
崇章句默知其不博乃遠游荊州從司馬德操
宋仲子等受古學皆通諸經史又專精於左氏
春秋自劉歆條例鄭衆賈逵父子陳元方服虔
注說咸略誦述不復按本先主定益州領牧以爲
勸學從事及立太子以默爲僕射以左氏傳授
後主後主踐阼拜諫議大夫丞相亮住漢中請
爲軍祭酒亮卒還成都拜太中大夫卒子宗傳

其業爲博士

宋仲子後在魏魏略曰其子與魏諷謀反伏誅魏太子荅王朗書曰昔石厚與州吁游父

儲知其與亂韓子昭田蘇穆子知其好仁故君子游必有方居必就士誠有以也嗟夫宋忠無石子先識之明老羅此禍今雖欲願行戒親之誅立純臣之節尚可行邪

李譔傳

李譔字欽仲梓潼涪人也父仁字德賢與同縣尹默俱游荊州從司馬徽宋忠等學譔具傳其業又從默講論義理五經諸子無不該覽加博好技藝筭術卜數醫藥弓弩機械之巧皆致思焉始爲州書佐尚書令史延熙元年後主立太子以譔爲庶子遷爲僕射轉中散大夫右中郎

將猶侍太子太子愛其多知甚悅之然體輕脫
好戲啁故世不能重也著古文易尚書毛詩三
禮左氏傳太玄拍歸皆依準賈馬異於鄭玄與
王氏殊隔初不見其所述而意歸多同景耀中
卒時又有漢中陳術字申伯亦博學多聞著釋
問七篇益部耆舊傳及志位歷三郡太守

譙周傳

譙周字允南巴西西充國人也父岍字榮始治
尚書兼通諸經及圖緯州郡辟請皆不應州就
假師友從事周幼孤與母兄同居既長耽古篤

學家貧未嘗問產業誦讀典籍欣然獨笑以忘
寢食研精六經尤善書札頗曉天文而不以留
意諸子文章非心所存不悉徧視也身長八尺
體貌素朴性推誠不飾無造次辯論之才然潛
識內敏建興中丞相亮領益州牧命周爲勸學
從事蜀記曰周初見亮左右皆笑既出有司請推笑者亮曰孤尚不能忍況左右乎亮卒於敵庭
周在家聞問即便奔赴尋有詔書禁斷惟周以
速行得達大將軍蔣琬領刺史徙爲典學從事
總州之學者後主立太子以周爲僕轉家令時
後主頗出游觀增廣聲樂周上疏諫曰昔王莽

之敗豪傑並起跨州據郡欲弄神器於是賢才智士思望所歸未必以其勢之廣狹惟其德之薄厚也是故於時更始公孫述及諸有大衆者多已廣大然莫不快情恣欲怠於爲善游獵飲食不恤民物世祖初入河北馮異等勸之曰當行人所不能爲遂務理冤獄節儉飲食動遵法度故北州歌歎聲布四遠於是鄧禹自南陽追之吳漢寇恂未識世祖遙聞德行遂以權計舉漁陽上谷突騎迎于廣阿其餘望風慕德者邛貊耿純劉植之徒至于輿病齋棺緼負而至者

不可勝數故能以弱爲彊屠王郎吞銅馬折赤
眉而成帝業也及在洛陽嘗欲小出車駕已御
銚期諫曰天下未寧臣誠不願陛下細行數出
即時還車及征隗囂潁川盜起世祖還洛陽但
遣寇恂往恂曰潁川以陛下遠征故姦猾起叛
未知陛下還恐不時降陛下自臨潁川賊必即
降遂至潁川竟如恂言故非急務欲小出不敢
至於急務欲自安不爲故帝者之欲善也如此
故傳曰百姓不徒附誠以德先之也今漢遭厄
運天下三分雄哲之士思望之時也陛下天姿

至孝喪踰三年言及隕涕雖曾閔不過也敬賢
任才使之盡力有踰成康故國內和一大小勑
力臣所不能陳然臣不勝大願願復廣人所不
能者夫輓大重者其用力苦不衆拔大艱者其
善術苦不廣且承事宗廟者非徒求福祐所以
率民尊上也至於四時之祀或有不臨池苑之
觀或有仍出臣之愚滯私不自安夫憂責在身
者不暇盡樂先帝之志堂構未成誠非盡樂之
時願省減樂官後宮所增造但奉脩先帝所施
下爲子孫節儉之教徙爲中散大夫猶侍太子

于時軍旅數出百姓彫瘁周與尚書令陳祗論其利害退而書之謂之仇國論其辭曰因餘之國小而肇建之國大並爭於世而爲仇敵因餘之國有高賢卿者問於伏愚子曰今國事未定上下勞心往古之事能以弱勝彊者其術何如伏愚子曰吾聞之處大無患者恒多慢處小有憂者恒思善多慢則生亂思善則生治理之常也故周人養民以少取多句踐卹衆以弱斃彊此其術也賢卿曰曩者項彊漢弱相與戰爭無日寧息然項羽與漢約分鴻溝爲界各欲歸息

民張良以爲民志既定則難動也尋帥追羽終斃項氏豈必由文王之事乎肇建之國方有疾疚我因其隙陷其邊陲覬增其疾而斃之也伏愚子曰當殷周之際王侯世尊君臣久固民習所專深根者難拔據固者難遷當此之時雖漢祖安能杖劍鞭馬而取天下乎當秦罷侯置守之後民疲秦役天下土崩或歲改主或月易公鳥驚獸駭莫知所從於是豪彊並爭虎裂狼分疾搏者獲多遲後者見吞今我與肇建皆傳國易世矣既非秦末鼎沸之時實有六國並據之

勢故可爲文王難爲漢祖夫民疲勞則搔擾之
非生上慢下暴則瓦解之形起諺曰射幸數跌
不如審發是故智者不爲小利移目不爲意似
改步時可而後動數合而後舉故湯武之師不
再戰而克誠重民勞而度時審也如遂極武黷
征土崩勢生不幸遇難雖有智者將不能謀之
矣若乃奇變從橫出入無間衝波截轍超谷越
山不由舟楫而濟盟津者我愚子也實所不及
後遷光祿大夫位亞九列周雖不與政事以儒
行見禮時訪大議輒據經以對而後生好事者

亦咨問所疑焉景耀六年冬魏大將軍鄧艾克
江由長驅而前而蜀本謂敵不便至不作城守
調度及聞艾已入陰平百姓擾擾皆迸山野不
可禁制後主使羣臣會議計無所出或以爲蜀
之與吳本爲和國宜可奔吳或以爲南中七郡
阻險斗絕易以自守宜可奔南惟周以爲自古
已來無寄他國爲天子者也今若入吳固當臣
服且政理不殊則大能吞小此數之自然也由
此言之則魏能并吳吳不能并魏明矣等爲小
稱臣孰與爲大再辱之恥何與一辱且若欲奔

南則當早爲之計然後可果今大敵以近禍敗將及羣小之心無一可保恐發足之日其變不測何至南之有乎羣臣或難周曰今艾以不遠恐不受降如之何周曰方今東吳未賓事勢不得不受之受之後不得不禮若陛下降魏魏不裂土以封陛下者周請身詣京都以古義爭之衆人無以易周之理後主猶疑於入南周上疏曰或說陛下以北兵深入有欲適南之計臣愚以爲不安何者南方遠夷之地平常無所供爲猶數反叛自丞相亮南征兵勢偏之窮乃幸從

是後供出官賦取以給兵以爲愁怨此患國之
人也今以窮迫欲往依恃恐必復反叛一也北
兵之來非但取蜀而已若奔南方必因人勢衰
及時赴追二也若至南方外當拒敵內供服御
費用張廣他無所取耗損諸夷必甚甚必速叛
三也昔王郎以邯鄲僭號時世祖在信都畏逼
於郎欲棄還關中邳彤諫曰明公西還則邯鄲
城民不肯捐父母背城主而千里送公其亡叛
可必也世祖從之遂破邯鄲今北兵至陛下南
行誠恐邳彤之言復信於今四也願陛下早爲

之圖可獲爵土若遂適南勢窮乃服其禍必深
易曰元之爲言知得而不知喪知存而不知亡
知得失存亡而不失其正者其惟聖人乎言聖
人知命而不苟必也故堯舜以子不善知天有
授而求授人子雖不肖禍尚未萌而迎授與人
況禍以至乎故微子以殷王之昆面縛銜璧而
歸武王豈所樂哉不得已也於是遂從周策劉
氏無虞一邦蒙賴周之謀也

孫綽評曰誰周說後主降魏可乎曰自爲天子

而乞降請命何恥之深乎夫爲社稷死則死之爲社稷亡則亡之先君正魏之篡不與同天矣推過於其父免首而事讎可謂苟存豈大居正之道哉○孫盛曰春秋之義國君死社稷即大夫死位况稱天子而可辱於人乎周謂万乘之君偷生苟免亡

禮希利要異微榮惑矣且以事勢言之理有未盡何者禪雖庸
主實無桀紂之酷戰雖屢北未有土崩之亂縱不能君臣固守
背城借一自可退次東鄙以思後圖是時羅憲以重兵據白帝
霍弋以彊卒鎮夜郎蜀土險狹山水峻隔絕獻數端非步卒所
步若悉收舟楫保據江州徵兵南中乞師東國如此則姜廖五
將自然雲從吳之三師承命電赴何投寄之無所而慮於必亡
邪魏師之來襄國大舉欲追則舟楫靡資欲留則師老多虞且
屈申有會情勢代起徐因思奮之民以攻驕惰之卒此越王所
以敗闔閭田單所以摧騎劫也何爲忽忽遽自囚虜下堅壁於
敵入致斫石之至恨哉葛生有云事之不濟則已耳安能復爲
之下壯哉斯言可以立懦夫之志矣觀古燕齊荆越之敗或國
覆主滅或魚縣烏鰐終能建功立事康復社稷豈曰天助抑亦
人謀也向使懷苟存之計納譙周之言何邦基之能構令名之
可獲哉禪既聞主周實驚爲臣方之申包田單范蠡大夫種不亦
乎時晉文王爲魏相國以周有全國之功封陽
城亭侯又下書辟周周發至漢中困疾不進咸
熙二年夏巴郡文立從洛還蜀過見周周語次

因書版示立曰典午忽兮月酉沒兮典午者謂
司馬也月酉者謂八月也至八月而文王果崩
華陽國志曰文立字廣休少治毛詩三禮兼通羣書刺史費禕
命爲從事入爲尚書郎復辟禕大將軍東曹掾稍遷尚書蜀并
于魏梁州建首爲別駕從事舉秀才晉泰始二年拜濟陰太守
遷太子中庶子立上言故蜀大官及盡忠死事者子孫雖仕郡
國或有不才同之齊民爲劇又諸葛亮蔣琬費禕等子孫流徙
中畿各宜量才叙用以慰巴蜀之心傾吳人之望事皆施行轉
散騎常侍獻可替否多所補納稍遷衛尉中朝服其賢
雅爲時名卿咸寧末卒立章奏詩賦論頌凡數十篇 晉室

踐阼累下詔所在發遣周周遂興疾詣洛泰始
三年至以疾不起就拜騎都尉周乃自陳無功
而封求還爵土皆不聽許五年予嘗爲本郡中
正清定事訖求休還家往與周別周語予曰昔

孔子七十二劉向揚雄七十一而沒今吾年過七十庶慕孔子遺風可與劉揚同軌恐不出後歲必便長逝不復相見矣疑周以術知之假此而言也六年秋爲散騎常侍疾篤不拜至冬卒

晉陽秋載詔曰朕甚悼之賜朝服一具衣一襲錢十五萬周息熙上言周臨終屬熙曰又抱疾未曾朝見若國恩賜朝服衣物者勿以加身當還舊墓道險行難豫作輕棺殯歛已畢上還所賜詔曰還衣服給棺直凡所著述

撰定法訓五經論古史考書之屬百餘篇

益部耆舊傳

傳曰益州刺史董榮圖畫周像於州學命從事李通頌之曰抑抑誰笑好古述儒寶道懷貞鑒世盈虛雅名美迹終始是書我后欽賢無言不譽攀諸前哲丹青是圖嗟爾來葉鑒茲顯模周三子熙賢同少子同

頗好周業亦以忠篤質素爲行舉孝廉除錫令

東宮洗馬召不就周長子熙熙子秀字元彥

陽

秋曰秀性清靜不交於世知將大亂豫絕人事從兄弟及諸親
理不與相見州郡辟命及李雄盜蜀安車徵秀又雄叔父驥驤
子壽辟命皆不應常冠鹿皮躬耕山藪永和三年安西將軍桓
溫平蜀表薦秀曰臣聞大林既虧則高尚之標顯道喪時昏則
忠貞之義彰故有洗耳投淵以振玄邈之風亦有秉心矯迹以
博在三之節是以上代之君莫不崇重斯軌所以篤俗訓民靜一
流競伏惟大晉應符御世運無常通時有屯蹇神州立墟三方
圯裂鬼置絕響於中材白駒無聞於空谷斯有識之所悼心大
雅之所歎息者也陛下聖德嗣興方恢天緒臣昔奉役有事西
土鯨鯢既縣思宣大化訪諸故老搜揚潛逸庶武羅於羿伋之
墟想王蠋於亡齊之境切聞巴西譙秀植操貞固抱德肥遁揚
清渭波于時皇極邁道消之會群黎蹈顛沛之艱中華有顧瞻
之哀幽谷無遷喬之望凶命屢招茲威仍偏身寄虎吻危同朝
露而能抗節王立誓不降辱杜門絕跡不面偽庭進免龔勝云
身之禍退無薛方詭對之譏雖園綺之棲商洛管寧之默遼海
方之於秀殆無以過于今西土以爲美談夫旌德礼賢化道之
所先崇表殊節聖哲之上務方今六合未康豺狼當路遺黎偷
薄義聲弗聞益宜振起道義之徒以躬流遁之弊若秀蒙蒲帛

之微足以鎮靜頹風軌訓鄙俗幽遐仰流九服知化矣及蕭敬
叛亂避難宕渠川中鄉人宗族馮依者以百數秀年八十衆人
以爲篤老欲代之負擔秀拒曰各有老弱當先管救吾氣
力自足堪此不以垂朽之年累諸君也後十餘年卒於家

郤正傳

郤正字令先河南偃師人也祖父儉靈帝末爲
益州刺史爲盜賊所殺會天下大亂故正父揖
因留蜀揖爲大將軍孟達營都督隨達降魏爲
中書令史正本名纂少以父死母嫁單瑋隻立
而安貧好學博覽墳籍弱冠能屬文入爲祕書
吏轉爲令史遷郎至令性澹於榮利而尤耽意
文章自司馬王楊班傳張蔡之儔遺文篇賦及

當世美書善論益部有者則鑽鑿推求略皆寓
目自在內職與官人黃皓比屋周旋經三十年
皓從微至貴操弄威權正既不爲皓所愛亦不
爲皓所憎是以官不過六百石而免於憂患依
則先儒假文見意號曰釋譏其文繼於崔駰達
旨其辭曰或有譏余者曰聞之前記夫事與時
並名與功偕然則名之與事前哲之急務也是
故剗制作範匪時不立流稱垂名匪功不記名
必須功而乃顯事亦俟時以行止身沒名滅君
子所耻是以達人研道探賾索微觀天運之符

表考人事之盛衰辯者馳說智者應機謀夫演
略武士奮威雲合霧集風激電飛量時揆宜用
取世資小屈大申存公忽私雖尺枉而尋直終
揚光以發揮也今三方鼎峙九有未乂悠悠四
海嬰丁禍敗嗟道義之沈塞愍生民之顛沛此
誠聖賢拯救之秋烈士樹功之會也吾子以高
朗之才珪璋之質兼覽博闡留心道術無遠不
致無幽不悉挺身取命幹茲奧祕躊躇紫闥喉
舌是執九考不移有入無出

尚書曰三載考績一考
黜陟幽明九考則二十

年究古今之真偽計時務之得失雖時獻一策

偶進一言釋彼官責慰此素飡固未能輸竭忠
款盡瀝曾肝排方入直惠彼黎元俾吾徒草鄙
並有聞焉也蓋亦綏衡綏轡回軌易塗輿安駕
肆思馬斯徂審厲揭以投濟要夷庚之赫撫播
秋蘭以芳世副吾徒之彼圖不亦盛與余聞而
歎曰嗚呼有若云乎邪夫人心不同實若其面
子雖光麗旣美且豔管闕篴舉守厥所見未可
以言八紘之形埒信萬事之精練也或人率爾
仰而揚衡曰是何言與是何言與余應之曰虞
帝以面從爲戒孔聖以悅己爲尤若子之言良

我所思將爲吾子論而釋之昔在鴻荒矇昧肇
初三皇應錄五帝承符爰暨夏商前典攸書姬
衰道缺霸者翼扶嬴氏慘虐吞嚼八區於是從
橫雲起狙詐如星竒邪逢蠱動智故萌生或飾真
以讎僞或挾邪以干榮或詭道以要上或鬻技
以自矜背正崇邪弃直就佞忠無定分義無常
經故鞅法窮而慝作斯義敗而茲成呂門大而
宗滅韓辯立而身刑夫何故哉利回其心寵耀
其目赫赫龍章鑠鑠車服媮幸苟得如反如仄
淫邪荒迷恣睢自極和鸞未調而身在轅側庭

寧未踐而棟折榱覆天收其精地縮其澤人平
其躬鬼焚其頤初升高岡終隕幽壑朝含榮潤
夕爲枯魄是以賢人君子深圖遠慮畏彼咎戾
超然高舉寧曳尾於塗中穢濁世之休譽彼豈
輕主慢民而忽於時務哉蓋易著行止之戒詩
有靖恭之歎乃神之聽之而道使之然也自我
大漢應天順民政治之隆皓若陽春俯憲坤典
仰式乾文播皇澤以熙世揚茂化之醲醇君臣
履度各守厥真上垂詢納之弘下有匡救之責
士無虛華之寵民有一行之迹粲乎疊疊尚此

忠盜然而道有隆窳物有興廢有聲有寂有光
有翳朱陽否於素秋玄陰抑於孟春羲和逝而
望舒係運氣匿而耀靈陳冲質不永桓靈墜敗
英雄雲布豪傑蓋世家挾殊議人懷異計故從
橫者歛拔其鬚眉沮詐者暫吐其舌也今天綱已
綴德樹西鄰不顯祖之宏規繫好爵於士人興
五教以訓俗豐九德以濟民肅明祀以約祭幾
皇道以輔真雖時者未一僞者未分聖人垂戒
蓋均無負故君臣協美於朝黎庶欣戴於野動
若重規靜若疊矩濟濟偉彥元凱之倫也有過

必知顏子之仁也侃侃庶政冉季之治也鷹揚
鷩騰伊望之事也總羣俊之上略合薛氏之三
計敷張陳之秘策故力征以勤世援華英之不
遑豈暇脩枯籜於榛穢哉然吾不才在朝累紀
託身所天心焉是恃樂滄海之廣深歎嵩嶽之
高跼聞仲尼之贊商感鄉校之益已彼平仲之
和羹亦進可而替否故矇冒瞽說時有攸獻譬
適人之有采於市問游童之吟詠乎疆畔庶以
增廣福祥輸力規諫若其合也則以闇協明進
應靈符如其違也自我常分退守已愚進退任

數不矯不評循性樂天夫何恨諸此其所以既入
不出有而若無者也狹屈氏之常醒濁漁父之
必醉溷柳季之卑辱徧夷叔之高對合景不以得
違不以失得不充詘失不慘惻不樂前以顧軒不
就後以慮輕不粥譽以干澤不辭愆以忌絀何
責之釋何殮之卹何方之排何責之入九考不
移固其所執也方今朝士山積髦俊成羣猶鱗
介之潛乎巨海毛羽之集乎鄧林游禽逝不爲
之歎浮鰲臻不爲之殷且陽靈幽於唐葉陰精
應於商時陽盱請而洪災息桑林禱而甘澤滋

淮南子曰禹爲水以身請於陽旰之河湯君旱以身禱於桑
林之祭聖人之憂民如此其明也呂氏春秋曰昔殷湯克夏
桀而天下大旱五年不收湯乃以身禱於桑林曰余一人有
罪無及萬方萬方有罪在余一人無以一人之不敏使上帝
鬼神傷民之命湯於是剪其髮裸其身自以行止有道啓
爲犧牲用祈福於上帝民乃其悅雨乃大至行止有道啓
塞有期我師遺訓不怨不尤委命恭已我又何
辭辭窮路單將反初節綜墳典之流芳尋孔氏
之遺藝綴微辭以存道憲先軌而投制躡叔
之優游美疎氏之遐逝收止足以言歸汎皓然
以容裔欣環堵以恬娛免咎悔於斯世顧茲心
之未泰懼末塗之淫滯仍求激而增憤肆中懷
以告堯舜九方考精於至貴秦牙沉思於殊形

淮南子曰秦穆公謂伯樂曰子之年長矣子姓有可使求馬者乎對曰良馬者可以形容筋骨相也相天下之馬者若城若谷若失若亡其一若此馬者絕壘却轍臣之子皆下才也可告以良馬而不可告以天下之馬天下之馬臣有所與共詹纏采薪九方堙此其相馬非臣之下也請見之穆公見之使之求馬三月而反報曰已得馬矣在於沙丘穆公曰何馬也對曰牝而黃使人往取之牡而驪穆公不說召伯樂而問之曰敗矣子之所使求馬者也毛物牝牡尚弗能知又何馬之能知伯樂喟然太息曰一至此乎是乃所以千萬里馬而無數者也若堙之所觀者天機也得其精而忘其麤在其內而忘其外見其所見而不見其所不見視其所視而遺其所不視若彼之所相者乃有貴乎馬者馬至而果天下之馬之馬淮南子又曰伯樂寒風秦牙葛青所相薛燭察寶各異其知馬一也蓋九方觀其精秦牙察其形

以飛譽

越絕書曰昔越王勾踐有寶劍五枚聞於天下客有能相劍者名薛燭王召而問之吾有寶劍五請

以示子乃取豪曹巨闕薛燭曰皆非也又取純鈎湛盧薛燭曰觀其劍鈔爛爛如列宿之行觀其光渾渾如水之將溢於塘觀其文渙渙如冰將釋此所謂純鈎邪王曰是也王曰客有直之者有市之鄉三駿馬千四千戶之都二可乎薛燭曰不

可當造此劍之時赤堇之山破而出錫若邪之溪涸而出銅
雨師掃灑雷公擊鼓太一下觀天精下之歐冶乃因天之精
悉其技巧一曰純鉤二曰湛盧今赤堇之山已合若邪之溪
深而不測歐冶子已死雖傾城量金珠玉竭河獨不得此一
物有市之鄉三駿馬千匹千戶之都二亦何足言與
而鱣魚聽之又曰瓠梁託弦以流聲淮南子曰瓠巴鼓瑟
可隨也而以歌者不可為也齊隸拊髀以濟文臣松之曰按此
謂孟嘗君田文下坐客能作雞鳴以濟其厄
者也凡作雞鳴必先拊髀以倣雞之拊翼也楚客潛寇以
保荆淮南子曰楚將子發好求技道之士楚有善為偷者往
見曰聞君求技道之士臣偷也願以技備一卒子發聞
之衣不及帶冠不暇正出見而禮之左右諫曰偷者天下之
盜也何為禮之君曰此非左右之所得與後無幾何齊興兵
伐楚子發將師以當之兵三却楚賢大夫皆盡其計而悉其
誠齊師愈彊於是卒偷進請曰臣有薄技願為君行之君曰
諾偷即夜出解齊將軍之幃帳而獻之子發子發使人歸之
曰卒有出採薪者得將軍之帳使使歸於執事明日又復往
取枕子發又使歸之明日又復往取簪子發又使歸之齊師
聞之大駭將軍與軍吏謀曰今日不去楚軍恐取吾頭矣即

旋師而去

雍門援琴而挾說

相譚新論曰雍門周以琴見

文悲乎對曰臣之所能令悲者先貴而後賤昔富而今貧擯壓窮巷不交四鄰不若身材高妙懷質抱真逢讒謗終結而不得信不若交歡而結髮受無怨而生離遠赴絕國無相見期不若幼無父母壯無妻兒出以野澤為鄰入用堀穴為家困於朝夕無所假貸若此人者但聞飛鳥之號秋風鳴條則傷心矣臣一為之援琴而長太息未有不悽惻而涕泣者也今若足下居則廣廈高堂連闥洞房下羅帷來清風倡優在前韶諛侍側揚激楚舞鄭妾流聲以娛耳練色以淫目水戲則舫龍舟建羽旗鼓鈞乎不測之淵野游則登平原馳廣固疆弩下高鳥勇士格猛獸置酒娛樂沈醉忘歸方此之時視天地曾不若一指雖有善鼓琴未能動足下也孟嘗君曰固然雍門周曰然臣竊為足下有所常悲夫角帝而困秦者君也連五國而伐楚者又君也天下未嘗無事不從即鯁從成則楚王衡成則秦帝夫以秦楚之彊而報弱薛猶磨蕭斧而伐朝菌也有識之士莫不為足下寒心天道不常盛寒暑更進退千秋萬歲之後宗廟必不血食高臺既已傾曲池又已平墳墓生荆棘狐狸穴其中游兒收堅躑躅其足而歌其上曰孟嘗君之尊貴亦猶若是乎於是孟嘗君喟然太息涕

淚承睫而未下雍門周引琴而鼓之徐動宮徵叩角羽終而成曲孟嘗君遂獻款而就此之曰先生鼓琴令文立若亡國之人也
韓哀秉轡而馳名
呂氏春秋曰韓哀作御王褒聖主得賢臣頌曰及至駕轡參乘旦

王良執鞭韓哀附輿縱馳騁驚忽如景靡過都越國蹶如歷塊追奔電逐遺風周流八極萬里一息何其遼哉人馬相得也
盧敖翔翔乎玄闕若士竦身於雲清
淮南子曰

北海經乎太陰入乎玄闕至於蒙轂之上見一士焉深目而玄準戾頸而鳶肩豐上而殺下軒軒然方迎風而舞頓見盧敖慢然下其臂邀遊乎碑下盧敖俯而視之方卷龜殼而食合梨盧敖乃與之語曰惟敖為背羣離黨窮觀於六合之外者非敖而已乎敖幼而好游長不喻解周行四極惟比陰之不闕今卒睹夫子於是子殆可與敖為交乎若士者齋然而笑曰嘻乎子中州民寧肯而遠至此此猶光乎日月而戴列星陰陽之所行四時之所生此其比夫不名之地猶突奧也若我南游乎罔畧之野北息乎沈墨之鄉西窮冥冥之黨東貫鴻濛之光此其下無地而上無天聽焉無聞視焉則眴此其外猶有沈沈之祀其餘一舉而子萬里吾猶未能之在今子游始至於此乃語窮觀豈不亦遠哉然子處矣吾與汗漫期於

郤正

九域之上吾不可以久若士舉臂而竦身遂入雲中盧敖仰而視之弗見乃止曰吾此夫子也借黃鵠之與蜚蟲終日行不離咫尺自以爲遠不亦悲哉

余實不能齊技於數子故乃靜然守己而自寧景耀六年後主從譙周之計遣使請降於鄧艾其書正所造也明年正月鍾會作亂成都後主東遷洛陽時擾攘倉卒蜀之大臣無翼從者惟正及殿中督汝南張通捨妻子單身隨侍後主賴正相導宜適舉動無闕乃慨然歎息恨知正之晚時論嘉之賜爵關內侯泰始中除安陽令遷巴西太守泰始八年詔曰正昔在成都顛沛守義不違忠節及見受用盡心幹

事有治理之績其以正爲巴西太守咸寧四年
卒凡所著述詩論賦之屬垂百篇

評曰杜微脩身隱靜不役當世庶幾夷皓之槩
周羣占天有徵杜瓊沈默慎密諸生之純也許孟
來李博涉多聞尹默精於左氏雖不以德業爲
稱信皆一時之學士譙周詞理淵通爲世碩儒
有董楊之規郤正文辭粲爛有張蔡之風加其
行止君子有取焉二子處晉事少在蜀事多故
著于篇

張璠以爲譙周所陳降魏之策蓋素料劉禪懦弱心
無害矣故得行也如遇忿肆之人雖無他筭然矜殉

鄰取或發怒妄誅以立一時之威使
其斯須之意者此亦更賊之禍云

蜀志第十二

黃李呂馬主張傳第十三 蜀書國志四十三

黃權傳

黃權字公衡巴西閬中人也少爲郡吏州牧劉璋乃爲主簿時別駕張松建議宜迎先主使伐張魯權諫曰左將軍有驍名今請到欲以部曲遇之則不滿其心欲以賓客禮待則一國不容二君若客有泰山之安則主有累卵之危可但閉境以待河清璋不聽竟遣使迎先主出權爲廣漢長及先主襲取益州將帥分下郡縣郡縣望風景附權閉城堅守須劉璋稽服乃詣降先

主先主假權偏將軍

徐衆評曰權既忠諫於主又開城拒守得事君之禮武王下車

封比干之墓表商容之閭所以大顯忠賢之士而明示所貴之旨先主假權將軍善矣然猶薄少未足彰忠義之高節而大勸爲善者之心及曹公破張魯魯走入巴中權進曰若

失漢中則三巴不振此爲割蜀之股臂也於是先主以權爲護軍率諸將迎魯魯已還南鄭北降曹公然卒破杜濩朴胡殺夏侯淵據漢中皆權本謀也先主爲漢中王猶領益州牧以權爲治中從事及稱尊號將東伐吳權諫曰吳人悍戰又水軍順流進易退難臣請爲先驅以當寇陛下宜爲後鎮先主不從以權爲鎮北將軍督

江北軍以防魏師先主自在江南及吳將軍陸議
乘流斷圍南軍敗績先主引退而道隔絕權不
得還故率將所領降于魏有司執法白收權妻
子先主曰孤負黃權權不負孤也待之如初

臣松

之以為漢武甲虎固之言咸李陵之家劉主拒衛司所執宥
黃權之室一一主得失縣絕矣詩云樂只君子保乂爾後其
謂也魏文帝謂權曰君捨逆効順欲追蹤陳

韓邪權對曰臣過受劉主殊遇降吳不可還蜀
無路是以歸命且敗軍之將免死為幸何古人
之可慕也文帝善之拜為鎮南將軍封育陽侯
加侍中使之陪乘蜀降人或云誅權妻子權知

其虛言未便發喪

漢魏春秋曰文帝詔令發喪權曰臣與劉焉准誠相信明臣本志疑或

未實請須後問

後得審問果如所言及先主薨問至魏羣

臣咸賀而權獨否文帝察權有局量欲試發之遣左右詔權未至之間累催相屬馬使奔馳交錯於道官屬侍從莫不碎魄而權舉止顏色自若後領益州刺史徙占河南大將軍司馬宣王深器之問權曰蜀中有卿輩幾人權笑而答曰不圖明公見顧之重也宣王與諸葛亮書曰黃公衡快士也每坐起歎述足下不去口實景初三年蜀延熙二年權遷車騎將軍儀同三司

記

曰魏明帝問權天下鼎立當以何地爲正權對曰當以天文爲正往者災或守心而文皇帝崩吳蜀二主平安此其徵也
明年卒謚曰景侯子邕嗣邕無子絕權留蜀子
崇爲尚書郎隨衛將軍諸葛瞻拒鄧艾到涪縣
瞻盤桓未進崇屢勸瞻宜速行據險無令敵得
入平地瞻猶與未納崇至于流涕會艾長驅而
前瞻却戰至縣竹崇帥厲軍士期於必死臨陣
見殺

李恢傳

李恢字德昂建寧人前元人也仕郡督郵姑夫爨
習爲建伶令有違法之事恢坐習免官太守董

和以習方士大姓寢而不許

華陽國志曰習後官至領軍

後貢

恢於州涉道未至聞先主自葭萌還攻劉璋恢知璋之必敗先主必成也乃託名郡使北詣先主遇於縣竹先主嘉之從至雒城遣恢至漢中交好馬超超遂從命成都既定先主領益州牧以恢爲功曹書佐主簿後爲亡虜所誣引恢謀反有司執送先主明其不然更遷恢爲別駕從事章武元年庾降都督鄧方卒先主問恢誰可代者恢對曰人之才能各有長短故孔子曰其使人也器之且夫明主在上則臣下盡情是以

西零之役趙充國曰莫若老臣臣竊不自量惟
陛下察之先主笑曰孤之本意亦已在卿矣遂
以恢爲康降都督使持節領交州刺史住平夷

縣

臣松之訊之蜀人云康降地名去蜀二千餘里時未有
寧州號爲南中立此職以摠攝之晉泰始中始分爲寧

州先主薨高定恣睢於越雋雍閬跋扈於建寧

朱褒反叛於牂牁丞相亮南征先由越雋而恢
案道向建寧諸縣大相糾合圍恢軍於昆明時
恢衆少敵倍又未得亮聲息紹謂南人曰官軍
糧盡欲規退還吾中間久斥鄉里乃今得旋不
能復北欲還與汝等同計謀故以誠相告南人

信之故圍守怠緩於是恢出擊大破之追奔逐
北南至槃江東接牂牁與亮聲勢相連南土平
定恢軍功居多封漢興亭侯加安漢將軍後軍
還南夷復叛殺害守將恢身往撲討鉏盡惡類
徙其豪帥于成都賦出叟濮耕牛戰馬金銀犀
革充繼軍資于時費用不乏建興七年以交州
屬吳解恢刺史更領建寧太守以還居本郡徙
居漢中九年卒子遺嗣恢弟子球羽林右部督
隨諸葛瞻拒鄧艾臨陣授命死于綿竹

呂凱傳

呂凱字季平永昌不韋人也

孫盛蜀世譜曰初秦徙呂不韋子弟宗族

於蜀漢漢武帝時開西南夷置郡縣徙呂氏以充之因曰不韋縣

仕郡五官掾功曹時

雍閬等聞先主薨於永安驕黠滋甚都護李嚴

與閬書六紙解喻利害閬但荅一紙曰蓋聞天

無二日土無二王今天下鼎立正朔有三是以

遠人惶惑不知所歸也其桀慢如此閬又降於

吳吳遙署閬爲永昌太守永昌旣在益州郡之

西道路雍塞與蜀隔絕而郡太守改易凱與府

丞蜀郡王伉帥厲吏民閉境拒閬閬數移檄永

昌稱說云云凱荅檄曰天降喪亂奸雄乘釁天

下切齒萬國悲悼臣妾大小莫不思竭筋力肝
腦塗地以除國難伏惟將軍世受漢恩以爲當
躬聚黨衆率先啓行上以報國家下不負先人
書功竹帛遺名千載何期臣僕吳越背本就末
乎昔舜勤民事墮于蒼梧書籍嘉之流聲無窮
崩于江浦何足可悲文武受命成王乃平先帝
龍興海內望風宰臣聰睿自天降康而將軍不
覩盛衰之紀成敗之符譬如野火在原蹈履河
冰火滅冰泮將何所依附曩者將軍先君雍侯
造然而封竇融知興歸志世祖皆流名後葉世

歌其美今諸葛丞相英才挺出深覩未萌受遺
託孤翊贊季興與衆無忌錄功忘瑕將軍若能
翻然改圖易跡更步古人不難追鄙土何足宰
哉蓋聞楚國不恭齊桓是責夫差僭號晉人不
長況臣於非主誰肯歸之邪竊惟古義臣無越
境之交是以前後有來無往重承告示發憤忘
食故略陳所懷惟將軍察焉凱威恩內著爲郡
中所信故能全其節及丞相亮南征討闡既發
在道而聞已爲高定部曲所殺亮至南上表曰
永昌郡吏呂凱府丞王伉等執忠絕域十有餘

年雍闓高定偏其東北而凱等守義不與交通
臣不意永昌風俗敦直乃爾以凱爲雲南太守
封陽遷亭侯會爲叛夷所害子祥嗣而王伉亦
封亭侯爲永昌太守

蜀世譜曰呂祥後爲晉南夷校尉
祥子及孫世爲永昌太守李雄破

寧州諸呂不肯附舉郡
固守王伉等亦守正節

馬忠傳

馬忠字德信巴西閬中人也少養外家姓狐名
篤後乃復姓改名忠爲郡吏建安末舉孝廉除
漢昌長先主東征敗績虜亭巴西太守閬芝發
諸縣兵五千人以補遺闕遣忠送往先主已還

永安見忠與語謂尚書令劉巴曰雖亡黃權復得狐篤此爲世不乏賢也建興元年丞相亮開府以忠爲門下督二年亮入南拜忠牂牁太守郡丞朱褒反叛亂之後忠撫育卹理甚有威惠八年召爲丞相參軍副長史蔣琬署留府事又領州治中從事明年亮出祁山忠詣亮所經營戎事軍還督將軍張嶷等討汶山郡叛羌十一年南夷豪帥劉胄反擾亂諸郡徵庾降都督張翼還以忠代翼忠遂斬胄平南土加忠監軍奮威將軍封博陽亭侯初建寧郡殺太守正昂縛

太守張裔於吳故都督常駐平夷縣至忠乃移
治味縣處民夷之間又越雋郡亦久失土地忠
率將太守張疑開復舊郡由此就加安南將軍
進封彭鄉亭侯延熙五年還朝因至漢中見大
司馬蔣琬宣傳詔旨加拜鎮南大將軍七年春
大將軍費禕北禦魏敵留忠成都平尚書事禕
還忠乃歸南十二年卒子脩嗣脩弟恢懷子義
晉建寧太守忠
爲人寬濟有度量但談啁大笑忿怒不形於色
然處事能斷威恩並立是以蠻夷畏而愛之及
卒莫不自致喪庭流涕盡哀爲之立廟祀迄今猶

在張表時名士清望踰忠閻宇宿有功幹於事
精勤繼踵在忠後其威風稱績皆不及忠

益邵著舊

傳曰張表肅子也華陽國志云表張
松子未詳閻宇字文平南郡人也

王平傳

王平字子均巴西宕渠人也本養外家何氏後
復姓王隨杜濩朴胡詣洛陽假校尉從曹公征
漢中因降先主拜牙門將裨將軍建興六年屬
參軍馬謖先鋒謖舍水上山舉措煩擾平連規
諫謖謖不能用大敗於街亭衆盡星散惟平所
領千人鳴鼓自持魏將張郃疑其伏兵不往逼

也於是平徐徐收合諸營遺迸率將士而還丞相亮既誅馬謖及將軍張休李盛奪將軍黃襲等兵平特見崇顯加拜參軍統五部兼當營事進位討寇將軍封亭侯九年亮圍祁山平別守南圍魏大將軍司馬宣王攻亮張郃攻平平堅守不動郃不能克十二年亮卒於武功軍退還魏延作亂一戰而敗平之功也遷後典軍安漢將軍副車騎將軍吳壹住漢中又領漢中太守十五年進封安漢侯代壹督漢中延熙元年大將軍蔣琬住沔陽平更爲前護軍署琬府事六

年琬還住涪拜平前監軍鎮北大將軍統漢中
七年春魏大將軍曹爽率步騎十餘萬向漢川
前鋒已在駱谷時漢中守兵不滿三萬諸將大
驚或曰今力不足以拒敵聽當固守漢樂二城
遇賊令入比爾間涪軍足得救關平曰不然漢
中去涪垂千里賊若得關便爲禍也今宜先遣
劉護軍杜叅軍據興勢平爲後拒若賊分向黃
金平率千人下自臨之比爾間涪軍行至此計
之上也惟護軍劉敏與平意同即便施行涪諸
軍及大將軍費禕自成都相繼而至魏軍退還

如平本策是時鄧芝在東馬忠在南平在北境
咸著名迹平生長戎旅手不能書而所識不過
十字而口授作書皆有意理使人讀史漢諸記
傳聽之備知其大義往往論說不失其指遵履
法度言不戲謔從朝至夕端坐徹日愷無武將
之體然性狹侵疑爲人自輕以此爲損焉十一
年卒子訓嗣初平同郡漢昌句句古扶忠勇寬
厚數有戰功功名爵位亞平官至左將軍封宕
渠侯

華陽國志曰後張翼廖化並爲大將
軍時人語曰前有王句後有張廖

張嶷傳

張嶷字伯岐巴西郡南充國人也

益部耆舊傳曰嶷出自孤微而

少有通壯之節

弱冠爲縣功曹先主定蜀之際山寇攻縣

縣長捐家逃亡嶷冒白刃攜負夫人夫人得免
由是顯名州召爲從事時郡內士人龔祿姚佺
位二千石當世有聲名皆與嶷友善建興五年
丞相亮北住漢中廣漢縣竹山賊張慕等鈔盜
軍資劫略吏民嶷以都尉將兵討之嶷度其鳥
散難以戰禽乃詐與和親克期置酒酒酣嶷身
率左右因斬慕等五十餘級渠帥悉殄尋其餘
類旬日清泰後得疾病困篤家素貧匱廣漢太

守蜀郡何祗名為通厚疑宿與疎闊乃自舉詣祗託以治疾祗傾財醫療數年除愈其黨道信義皆此類也拜為牙門將屬馬忠北討汶山叛羌南平四郡蠻夷輒有籌畫戰克之功

益部耆舊傳曰疑受

兵三百人隨馬忠討叛羌疑別督數營在先至他里邑所在高峻疑隨山立上四五里羌於要厄作石門於門上施牀積石於其上過者下石槌擊之無不糜爛疑度不可得攻乃使譯告曉之曰汝汶山諸種反叛傷害良善天子命將討滅惡類汝等若稽顙過軍資給糧費福祿永隆其報百倍若終不從大兵致誅雷擊雷下雖追悔之亦無益也耆帥得命即出詣疑給糧過軍軍前討餘種餘種聞他里已下悉恐怖失所或迎軍出降或奔竄山谷放兵攻擊軍以克捷後南夷劉胄又反以馬忠為督來降討胄疑復屬焉戰關常冠軍首遂斬胄平南事訖特柯興古僚種復反忠令疑領諸營往討疑內招降得二千人
十四年武都氏王符健請降遣將軍

悉傳詣漢中

張嶷

張尉往迎過期不到大將軍蔣琬深以爲念疑
平之曰符健求附欵至必無他變素聞健弟狡
黠又夷狄不能同功將有乖離是以稽留耳數
日間至健弟果將四百戶就魏獨健來從初越
雋郡自丞相亮討高定之後叟夷數反殺太守
龔其祿焦璜是後太守不敢之郡只住安定縣去
郡八百餘里其郡徒有名而已時論欲復舊郡
除疑爲越雋太守疑將所領往之郡誘以恩信
蠻夷皆服頗來降附北徼捉馬最驍勁不承節
度疑乃往討生縛其帥魏狼又解縱告喻使招

懷餘類表拜狼爲邑侯種落三千餘戶皆安土
供職諸種聞之多漸降服疑以功賜爵關內侯
蘇祁邑君冬逢逢弟隗渠等已降復反疑誅逢
逢妻旄牛王女疑以計原之而渠逃入西徼渠
剛猛捷悍爲諸種深所畏憚遣所親二人詐降
疑實取消息疑覺之許以重賞使爲反間二人
遂合謀殺渠渠死諸種皆安又斯都耆帥李求
承昔手殺龔祿疑求寡捕得數其宿惡而誅之
始疑以郡郭宇頽壞更築小塢在官三年徙還
故郡繕治城郭夷種男女莫不致力定祚臺登

卑水三縣去郡三百餘里舊出鹽鐵及漆而夷
徼久自固食疑率所領奪取署長吏焉疑之到
定祚定祚率豪狼岑槃木王舅甚爲蠻夷所信
任忿疑自侵不自來詣疑使壯士數十直往收
致撻而殺之持尸還種厚加賞賜喻以狼岑之
惡且曰無得妄動動即殄矣種類咸面縛謝過
疑殺牛饗宴重申恩信遂獲鹽鐵器用周贍漢
嘉郡界旄牛夷種類四千餘戶其率狼路欲爲
姑壻冬逢報怨遣叔父離將逢衆相度形勢疑
逆遣親近齎牛酒勞賜又令離姊逆逢妻宣暢

意旨離既受賜并見其姊姊弟歡悅悉率所領將詣嶷嶷厚加賞待遣還旄牛由是輒不爲患郡有舊道經旄牛中至成都既平且近自旄牛絕道已百餘年更由安上既險且遠嶷遣左右齎貨幣賜路重令路姑喻意路乃率兄弟妻子悉詣嶷嶷與盟誓開通舊道千里肅清復古亭驛奏封路爲旄牛昫毗王遣使將路朝貢後主於是加嶷撫戎將軍領郡如故嶷初見費禕爲大將軍恣性汎愛待信新附太過嶷書戒之曰昔岑彭率師來歙杖節咸見害於刺客今明將

軍位尊權重宜鑒前事少以爲警後禕果爲魏
降人郭脩所害吳太傅諸葛恪以初破魏軍大
興兵衆以圖攻取侍中諸葛瞻丞相亮之子恪
從弟也疑與書曰東主初崩帝實幼弱太傳受
寄託之重寄託之重亦何容易親以周公之才
猶有管蔡流言之變霍光受任亦有燕蓋上官
逆亂之謀賴成昭之明以免斯難耳昔每聞東
主殺生賞罰不任下人又今以垂沒之命卒召
太傅屬以後事誠實可慮加吳楚剽急乃昔所
記而太傅離少主履敵庭恐非良計長筭之術

也雖去東家綱紀肅然上下輯睦百有一失非
明者之慮邪取古則今今則古也自非郎君進
忠言於太傅誰復有盡言者也旋軍廣農務行德
惠數年之中東西並舉實爲不晚願深採察恪
竟以此夷族疑識見多如是類在郡十五年邦
域安穆屢乞求還乃徵詣成都夷民戀慕扶轂
泣涕過旄牛邑邑君極負來迎及追尋至蜀郡
界其督相率隨疑朝貢者百餘人疑至拜湯寇
將軍慷慨壯烈士人咸多貴之然放蕩少禮人
亦以此譏焉

益部耆舊傳曰時車騎將軍夏侯霸謂疑
曰雖與足下疎闊然託心如舊宜明此意

疑答曰僕未知子子未知我大道在彼何去託心
乎願三年之後徐陳斯言有識之士以爲美談
是歲延

熙十七年也魏狄道長李簡密書請降衛將軍

姜維率疑等因簡之資以出隴西

益部耆舊傳曰
疑風濕固疾至

都寢篤扶杖然後能起李簡請降衆議狐疑而疑曰必然姜
維之出時論以疑初還股疾不能在行中由是疑自乞肆力
中原致身敵庭臨發辭後主曰臣當值聖明受恩過量加以
疾病在身常恐一朝隕沒辜負榮遇天不違願得豫戎事若
涼州克定臣爲藩表守將若有未
捷殺身以報後主慨然爲之流涕既到狄道簡悉率城

中吏民出迎軍軍前與魏將徐質交鋒疑臨陣

隕身然其所殺傷亦過倍既亡封長子瑛西鄉

侯次子護雄襲爵南土越雋民夷聞疑死無不

悲泣爲疑立廟四時水旱輒祀之

益部耆舊傳曰
余觀張疑儀兒

辭令不能駭人而其策略足以入筭果烈足以立威爲臣有忠誠之節處類有亮直之風而動必顧典後主深崇之雖古之英士何以遠踰哉蜀世譜曰崑孫奔晉梁州刺史

評曰黃權弘雅思量李恢公亮志業呂凱守節

不回馬忠擾而能毅

尚書曰擾而毅鄭玄注曰擾馴也致果曰毅

王平忠

勇而嚴整張崑識斷明果咸以所長顯名發迹遇其時也

蜀書

國志四十三

黃李呂馬王張傳第十三

蔣琬費禕姜維傳第十四 蜀書國志四十四

蔣琬傳

蔣琬字公琰零陵湘鄉人也弱冠與外弟象陵劉敏俱知名琬以州書佐隨先主入蜀除廣都長先主嘗因游觀奄至廣都見琬衆事不理時又沈醉先主大怒將加罪戮軍師將軍諸葛亮請曰蔣琬社稷之器非百里之才也其爲政以安民爲本不以脩飾爲先願主公重加察之先主雅敬亮乃不加罪倉卒但免官而已琬見推之後夜夢有一牛頭在門前流血滂沱意甚惡

之呼問占夢趙直直曰夫見血者事分明也牛角及鼻公字之象君位必當至公大吉之徵也頃之爲什邡令先主爲漢中王琬入爲尚書郎建興元年丞相亮開府辟琬爲東曹掾舉茂才琬固讓劉邕陰化龐延廖淳亮教荅曰思惟背親捨德以殄百姓衆人既不隱於心實又使遠近不解其義是以君宜顯其功舉以明此選之清重也遷爲參軍五年亮住漢中琬與長史張裔統留府事八年代裔爲長史加撫軍將軍亮數外出琬常足食足兵以相供給亮每言公琰託

志忠雅當與吾共贊王業者也密表後主曰臣
若不幸後事宜以付琬亮卒以琬爲尚書令俄
而加行都護假節領益州刺史遷大將軍錄尚
書事封安陽亭侯時新喪元帥遠近危悚琬出
類拔萃勵羣僚之右旣無戚容又無喜色神守
舉止有如平日由是衆望漸服延熙元年詔琬
曰寇難未弭曹叡驕凶遼東三郡苦其暴虐遂
相糾結與之離隔叡大興衆役還相攻伐曩秦
之亡勝廣首難今有此變斯乃天時君其治嚴
揔帥諸軍屯住漢中須吳舉動東西掎角以乘

其釁又命琬開府明年就加爲大司馬東曹掾
揚戲素性簡略琬與言論時不應荅或欲搆戲
於琬曰公與戲語而不見應戲之慢上不亦甚
乎琬曰人心不同各如其面從後言古人之
所誠也戲欲贊吾是邪則非其本心欲反吾言
則顯吾之非是以默然是戲之使也又督農楊
敏曾毀琬曰作事憤憤誠非及前人或以白琬
主者請推治敏琬曰吾實不如前人無可推也
主者重據聽不推則乞問其憤憤之狀琬曰苟
其不如則事不當理事不當理則憤憤矣復何

問邪後敏坐事繫獄衆人猶懼其必死琬心無
適莫得免重罪其好意存道皆此類也琬以爲
昔諸葛亮數關秦川道險運艱竟不能克不若
乘水東下乃多作舟船欲由漢沔襲魏興上庸
會舊疾連動未時得行而衆論咸謂如不克捷
還路甚難非長策也於是遣尚書令費禕中監
軍姜維等喻指琬承命上疏曰交穢弭難臣職
是掌自臣奉辭漢中已經六年臣旣闇弱加嬰
疾疢規方無成夙夜憂慘今魏跨帶九州根帶
滋蔓平除未易若東西并力首尾掎角雖未能

速得如志且當分裂蠶食先摧其支黨然吳期
二三連不克果俯仰惟艱實忘寢食輒與費禕
等議以涼州胡塞之要進退有資賊之所惜且
羌胡乃心思漢如渴又昔偏軍入羌郭淮破走筭
其長短以爲事首宜以姜維爲涼州刺史若維
征行銜持河右臣當帥軍爲維鎮繼今涪水陸
四通惟急是應若東北有虞赴之不難由是琬
遂還住涪疾轉增劇至九年卒謚曰恭子斌嗣
爲綏武將軍漢城護軍魏大將軍鍾會至漢城
與斌書曰巴蜀賢智文武之士多矣至於足下

諸葛思遠璧壘誦草木五氣類也桑梓之敬古今
所敦西到欲奉瞻尊大君公侯墓當兩埽墳塋
奉祠致敬願告其所在斌荅書曰知惟臭味意
眷之隆雅託通流未拒來謂也亡考昔遭疾疢
亡於涪縣卜去其吉遂安厝之知君西邁乃欲
屈駕脩敬墳墓視予猶父顏子之仁也聞命感
愴以增情思會得斌書報嘉歎意義及至涪如
其書云後主旣降鄧艾斌詣會於涪待以交友
之禮隨會至成都爲亂兵所殺斌弟顯爲太子
僕會亦愛其才學與斌同時死劉敏左護軍揚

威將軍與鎮北大將軍王平俱鎮漢中魏遣大將軍曹爽襲蜀特議者或謂但可守城不出拒敵必自引退敏以爲男女布野農穀栖畝若聽敵入則大事去矣遂帥所領與平據興勢多張旗幟彌亘百餘里會大將軍費禕從成都至魏軍即退敏以功封雲亭侯

費禕傳

費禕字文偉江夏鄢人也鄢音盲少孤依族父伯仁伯仁姑益州牧劉璋之母也璋使迎仁仁將禕遊學入蜀會先主定蜀禕遂留益土與汝南

許叔龍南郡董允齊名時許靖喪子允與禕欲
共會其葬所允白父和請車和遣開後廐車給之
允有難載之色禕便從前先上及至喪所諸葛
亮及諸貴人悉集車乘甚鮮允猶神色未泰而
禕晏然自若持車人還和問之知其如此乃謂
允曰吾常疑汝於文偉優劣未別也而今而後
吾意了矣先主立太子禕與允俱爲舍人遷庶
子後主踐位爲黃門侍郎丞相亮南征還羣寮
於數十里逢迎年位多在禕右而亮特命禕同
載由是衆人莫不易觀亮以初從南歸以禕爲

昭信校尉使吳孫權性既滑稽嘲啁無方諸葛
恪羊衡等才博果辯論難鋒至禕辭順義篤據
理以答終不能屈禕別傳曰孫權每別酌好酒以飲禕視其已醉然後問以國事并論當世之務辭難累至禕輒辭以醉退而撰次所問事條答無所遺失權甚器之謂禕曰君

天下淑德必當股肱蜀朝恐不能數來也

禕別傳曰

權乃以手中常所執寶刀贈之禕答曰臣以不才何以堪明命然刀所以討不庭禁暴亂者也但願大王施建功業同樊漢室臣雖闇弱終不負東顧還遷為侍中亮北住漢中請禕為

參軍以奉使稱旨頻煩至吳建興八年轉為中護軍後又為司馬值軍師魏延與長史楊儀相憎惡每至並坐爭論延或舉刀擬儀儀泣涕橫

集禕常入其坐間諫喻分別級亮之世及盡延

儀之用者禕匡救之力也亮卒禕爲後軍師頃

之代蔣琬爲尚書令

禕別傳曰于時戰國多事公務煩猥禕識悟過人每省讀書記

舉目暫視已究其意旨其速數倍於人終亦不忘常以朝晡聽事其間接納賓客飲食嬉戲加之傳弈每盡人之歡事亦不發董允代禕爲尚書令欲數禕之所行旬日之中事多滯允乃數曰人才力相縣若此甚遠此非吾之所及也聽事終日猶有不暇爾琬自漢中還涪禕遷大將軍錄尚書事

延熙七年魏軍次于興勢假禕節率衆往禦之光祿大夫來敏至禕許別求共圍基于時羽檄交馳人馬擐甲嚴駕已訖禕與敏留意對戲色無厭倦敏曰向聊觀試君耳君信可人必能辨

賊者也。禕至敵，遂退封成鄉侯。

殷基通語曰：司馬懿誅曹爽，禕設甲。

乙論平其是非，甲以為曹爽兄弟凡庸人，苟以宗子枝屬得蒙顧命之任而驕奢僭逸，交非其人，私樹朋黨，謀以亂國。懿奮誅討，一朝殄盡，此所以稱其任副士民之望也。乙以為懿感曹仲付已，不一豈爽與相干，事勢不專，以此陰成疵瑕。初無忠告，侃爾之訓一朝屠戮，讒其不意，豈大人經國篤本之事乎？若爽信有謀主之心，大逆已構而發兵之日，更以芳委爽兄弟，懿父子從後閉門舉兵，蹙而向芳，必無悉寧。忠臣為君深慮之，謂乎以此推之，爽無大惡明矣。若懿以爽奢僭廢之，刑之可也，滅其尺口，彼以不義絕子，丹血食及何晏子魏之親甥，亦與同戮，為僭盜不當矣。

州職禕復領益州刺史，禕當國功名略與琬比。

禕別傳曰：禕雅性謙素，家不積財，兒子皆令布衣素食，出入不從車騎，無異凡人。

十一年出仕。

漢中自琬及禕，雖自身在外，慶賞威刑皆遙先諮斷，然後乃行其推任。如此後十四年夏，還成

費禕

都成郡望氣者去都邑無宰相位故冬復北屯
漢壽延熙十五年命禕開府十六年歲首大會
魏降人郭循在坐禕歡飲沈醉爲循手刃所害
謚曰敬侯子承嗣爲黃門侍郎承弟恭尚公主
禕別傳曰恭爲尚書郎顯名當世早卒禕長女配太子璿爲妃

姜維傳

姜維字伯約天水冀人也少孤與母居好鄭氏

學

傳子曰維爲人好立功名陰養死士不脩布衣之業

仕郡上計掾州辟爲從事

以父固昔爲郡功曹值羌戎叛亂身衛郡將沒
於戰場賜維官中郎參本郡軍事建興六年承

相諸葛亮軍向祁山時天水太守適出案行維
及功曹梁緒主簿尹賞主記梁虔等從行太守
聞蜀軍垂至而諸縣響應疑維等皆有異心於
是夜亡保上邽維等覺太守去追遲至城門城
門已閉不納維等相率還冀冀亦不入維維等
乃俱詣諸葛亮會馬謖敗於街亭亮拔將西縣千
餘家及維等還故維遂與母相失

魏略曰天水太守馬遵將維及

諸官屬隨雍州刺史郭淮偶自西至洛門案行會聞亮已到祁山淮顧遵曰是故不害遂驅東還上邽遵念所治與縣界在西偏又恐吏民舉亂遂亦隨淮去時維謂遵曰明府當還冀遵謂維等曰卿諸人回復信皆賊也各自行維亦無如遵何而家在冀遂與郡吏上官子脩等還冀冀中吏民見維等大喜便推令見亮二人不獲已乃共詣亮亮見大悅未及遣

迎異中人會亮前鋒為張郃費繇等所破遂將維等却縮維
不得還遂入蜀諸軍攻異皆得維母妻子亦以維本無去意
故不殺其家但繫保官以延之此語與本傳不同

亮辟維為倉曹掾加奉義將軍封當陽亭侯時年二十七亮與留府長史
張裔參軍蔣琬書曰姜伯約忠勤時事思慮精
密考其所有永南季常諸人不如也其人涼州
上士也又曰須先教中虎步兵五六千人姜伯
約甚敏於軍事既有膽義深解兵意此人心存
漢室而才兼於人畢教軍事當遣詣宮觀見主
上

孫盛雜記曰初姜維詣亮與母相失復得母書令求當
歸維曰良田百頃不在一畝但有遠志不在當歸也

後

遷中監軍征西將軍十二年亮卒維還成都為

右監軍輔漢將軍統諸軍進封平襄侯延熙元年隨大將軍蔣琬住漢中琬既遷大司馬以維爲司馬數率偏軍西入六年遷鎮西大將軍領涼州刺史十年遷衛將軍與大將軍費禕共錄尚書事是歲汶山平康夷反維率衆討定之又出隴西南安金城界與魏大將軍郭淮夏侯霸等戰於洮西胡王治無戴等舉部落降維將還安處之十二年假維節復出西平不克而還維自以練西方風俗兼負其才武欲誘諸羌胡以爲羽翼謂自隴以西可斷而有也每欲興軍大

舉費禕常裁制不從與其兵不過萬人

漢晉春秋曰費禕謂

維曰吾等不如丞相亦已遠矣丞相猶不能定中夏況吾等乎且不如保國治民敬守社稷如其功業以俟能者無以爲希冀微倖而決成敗於一

舉若不如志悔之無及

十六年春禕卒夏維率將

數萬人出石營經董亭圍南安魏雍州刺史陳

泰解圍至洛門維糧盡退還明年加督中外軍

事復出隴西守狄道長李簡舉城降進圍襄武

與魏將徐質交鋒斬首破敵魏軍敗退維乘勝

多所降下拔河間狄道臨洮三縣民還後十八

年復與車騎將軍夏侯霸等俱出狄道大破魏

雍州刺史王經於洮西經衆死者數萬人經退

保狄道城維圍之魏征西將軍陳泰進兵解圍
維却住鍾題十九年春就遷維爲大將軍更整
勒戎馬與鎮西大將軍胡濟期會上邽濟失誓
不至故維爲魏大將鄧艾所破於段谷星散流
離死者甚衆衆庶由是怨讟而隴已西亦騷動
不寧維謝過引負求自貶削爲後將軍行大將
軍事二十年魏征東大將軍諸葛誕反於淮南
分關中兵東下維欲乘虛向秦川復率數萬人
出駱谷徑至沈嶺時長城積穀甚多而守兵乃
少聞維方到衆皆惶懼魏大將軍司馬望拒之

鄧艾亦自隴右督軍于長城維前住亡水皆倚山爲營望艾傍渭堅圍維數下挑戰望艾不應景耀元年維聞誕破敗乃還成都復拜大將軍初先主留魏延鎮漢中皆實兵諸圍以禦外敵敵若來攻使不得入及興勢之役王平捍拒曹爽皆承此制維建議以爲錯守諸圍雖合周易重門之義然適可禦敵不獲大利不若使聞敵至諸圍皆斂兵聚穀退就漢樂二城使敵不得入平旦重關鎮守以捍之有事之日令游軍並進以伺其虛敵攻關不克野無散穀千里縣糧

自然疲乏引退之日然後諸城並出與游軍并
力搏之此殄敵之術也於是令督漢中胡濟却
住漢壽監軍王含守樂城護軍蔣斌守漢城又
於西安建威武衛石門武城建昌臨遠皆立圍
守五年維率衆出漢侯和爲鄧艾所破還住沓
中維本羈旅託國累年攻戰功績不立而官臣
黃皓等弄權於內右大將軍閭宇與皓協比而
皓陰欲廢維樹宇維亦疑之故自危懼不復還
成都

華陽國志曰維惡黃皓恣擅啓後主欲殺之後主曰皓趨走小臣耳往董允切齒吾常恨之君何足介意

維見皓枝附葉連懼於失言遂辭而出後主勅皓詣維陳謝維說皓求沓中種麥以避內逼爾六年維表

後主聞鍾會治兵關中欲規進取宜並遣張翼
廖化督諸軍分護陽安關口陰平橋頭以防未
然皓徵信鬼巫謂敵終不自致啓後主寢其事
而羣臣不知及鍾會將向駱谷鄧艾將入沓中
然後乃遣右車騎廖化詣沓中爲維援左車騎
張翼輔國大將軍董厥等詣陽安關口以爲諸
圍外助比至陰平聞魏將諸葛緒向建威故住
待之月餘維爲鄧艾所摧還住陰平鍾會攻圍
漢樂二城遣別將進攻關口蔣舒開城出降傳
僉格闕而死

漢晉春秋曰蔣舒將出降乃詭謂傳僉曰今
賊至不擊而開城自守非良圖也僉曰受命

保城惟全爲功今違命出戰若喪師負國死無益矣舒曰子
以保城獲全爲功我以出戰克敵爲功請各行其志遂率衆
出僉謂其戰也至陰平以降胡烈烈乘虛襲城僉格鬪而死
魏人義之蜀記曰蔣舒爲武興督在事無稱蜀令人代之
因留舒助漢中守舒恨故開城出降會攻樂城不能克聞關口已下長
驅而前翼厥甫至漢壽維化亦舍陰平而退適
與翼厥合皆還保劔閣以拒會會與維書曰公
侯以文武之德懷邁世之略功濟巴漢聲暢華
夏遠近莫不歸名每惟疇昔宜同大化吳札鄭
喬能喻斯好維不吝書列營守險會不能克糧
運縣遠將議還歸而鄧艾自陰平由景谷道傍
入遂破諸葛瞻於縣竹後主請降於艾艾前據

成都維等初聞瞻破或聞後主欲固守成都或聞欲南入建寧於是引軍由廣漢郫道以審虛實尋被後主敕令乃投戈放甲詣會於涪軍前將士咸怒拔刀斫石

于寶晉記云會謂維曰來何遲也維正色流涕曰今日見此為速矣

會甚奇之

會厚待維等皆權還其印號節蓋會與維

出則同輦坐則同席謂長史杜預曰以伯約比

中土名士公休太初不能勝也

世語曰時蜀官屬皆天下英俊無出維右

會既構鄧艾文檻車徵因將維等詣成都自稱

益州牧以叛

漢晉春秋曰會陰懷異圖維見而知其心謂可構成擾亂以圖克復也乃詭說會曰聞君

自淮南已來等無貴策立晉道克昌皆君之力今復定蜀威德振世民高其功主畏其謀欲以此安歸乎夫韓信不背漢於

擾攘以見疑於既平大夫鍾不從范蠡於五湖卒伏劍而妄
死彼豈闇主愚臣哉利害使之然也今君大功既立大德已
著何不法陶朱公泛舟絕迹全功保身登峨嵋之嶺而從赤
松游乎會曰君言遠矣我不能行且爲今之道或未盡於此
也維曰其佗則君智力之所能無煩於老夫矣由是情好歡
甚華陽國志曰維教會誅北來諸將既死徐欲殺教會盡坑
魏兵還復蜀祚密書與後主曰願陛下忍數日之辱臣欲使
社稷危而復安日月幽而復明孫盛晉陽秋曰盛以永和
初從安西將軍平蜀見諸故老及姜維既降之後密與劉禪
表疏說欲爲服事鍾會因殺之以復蜀土會事不捷遂至泯
滅蜀人于今傷之盛以爲古人六非所困而困焉名必辱非
所據而據焉身必危既辱且危死其將至其姜維之謂乎鄧
艾之入江由士衆鮮少維進不能奮節縣竹之下退不能撫
帥五將擁衛蜀主思後圖之語而乃反覆於逆順之間希違
情於難異之會以衰弱之國而屢觀兵於三秦已滅之邦異
理外之奇舉不亦闇哉臣松之以爲盛之譏維又爲不當
于時鍾會大衆既造劍閣維與諸將列營守險會不得進已
議還計全蜀之功幾乎立矣但鄧艾說道傍入出於其後諸
葛瞻既敗成都自潰維若回軍救內則會乘其背當時之勢
焉得兩濟而責維不能奮節縣竹擁衛蜀主非其理也會欲

盡坑魏將以舉大事授維重兵使爲前驅若令魏將皆死兵
事在維手殺會復蜀不爲難矣夫功成理外然後爲奇不可
以事有差牙而抑謂不然設使田單

之計邂逅不會復可謂之愚闇哉 欲授維兵五萬人

使爲前驅魏將士憤發殺會及維維妻子皆伏

誅

世語曰維死時見剖膽如斗大

卻正著論論維曰姜伯約據上將

之重處羣臣之右宅舍弊薄資財無餘側室無

妾媵之褻後庭無聲樂之娛衣服取供輿馬取

備飲食節制不奢不約官終費用隨手消盡察其

所以然者非以激貪厲濁抑情自割也直謂如

是爲足不在多求凡人之談常譽成毀敗扶高抑

下咸以姜維投厝無所身死宗滅以是貶削不

復料槌異乎春秋褒貶之義矣如姜維之樂學不倦清素節約自一時之儀表也

孫盛曰異哉邵氏之論也夫士雖百

行操業萬殊至於忠孝義節百行之冠冕也姜維策名魏室而外奔蜀朝違君徇利不可謂忠捐親苟免不可謂孝害加舊邦不可謂義敗不死難不可謂節且德政未敷而疲民以逞居禦侮之任而致敵喪守於夫智勇莫可去也凡斯六者維無一焉實有魏之遺臣亡國之亂相而去久之儀表亦或久矣縱維好書而微自藻紫豈異夫盜者分財之義而程鄭降階之善也臣松之以爲卻正此論取其可稱不謂維始終行事皆可準則也所云一時儀表止在好學與儉素耳本傳及魏略皆云維本無叛心以急逼歸蜀盛相譏貶惟可責其背盟餘既過苦又非所以難卻正也

維昔所

俱至蜀梁緒官至大鴻臚尹賞執金吾梁虔大長秋皆先蜀亡歿

評曰蔣琬方整有威重費禕寬濟而博愛咸承

諸葛之成規因循而不革是以邊境無虞邦家

和一然猶未盡治小之宜居靜之理也

臣松之以爲將費爲

相克遵畫一未嘗徇功妄動有所虧喪外卻駱谷之師內保寧緝之實治小之宜居靜之理何以過於此哉今譏其未盡而不著其事故使覽者不知所謂也

姜維粗有文武志立功名而翫衆

黷旅明斷不周終隕斃老子有云治大國者猶

烹小鮮況於區區最爾而可屢擾乎哉

千寶曰姜維爲

蜀相國亡主辱弗之死而死於鍾會之亂惜哉非死之難處死之難也是以古之烈士見危授命投節如歸非不受死也固知命之不長而懼不得其所也

蔣琬費禕姜維傳第十四

蜀書

國志四十四

鄧張宗楊傳第十五

蜀書 國志四十五

鄧芝傳

鄧芝字伯苗義陽新野人漢司徒馬之後也漢
未入蜀未見知待時益州從事張裕善相芝往
從之裕謂芝曰君年過七十位至大將軍封侯
芝聞巴西太守龐羲好士往依焉先主定益州
芝爲郫邸閣督先主出至郫與語大奇之擢爲
郫令遷廣漢太守所在清嚴有治績入爲尚書
先主薨於永安先是吳王孫權請和先主累遣
宋瑋費禕等相與報答丞相諸葛亮深慮權聞

先主殂隕恐有異計未知所如芝見亮曰今主上幼弱初在位宜遣大使重申吳好亮荅之曰吾思之久矣未得其人耳今日始得之芝問其人爲誰亮曰即使君也乃遣芝脩好於權權果狐疑不時見芝芝乃自表請見權曰臣今來亦欲爲吳非但爲蜀也權乃見之語芝曰孤誠願與蜀和親然恐蜀主幼弱國小勢偏爲魏所乘不自保全以此猶豫耳芝對曰吳蜀二國四州之地大王命世之英諸葛亮亦一時之傑也蜀有重險之固吳有三江之阻合此二長共爲唇

齒進可并兼天下退可鼎足而立此理之自然也大王今若委質於魏魏必上望大王之入朝下求太子之內侍若不從命則奉辭伐叛蜀必順流見可而進如此江南之地非復大王之有也權默然良久曰君言是也遂自絕魏與蜀連和遣張溫報聘於蜀蜀復命溫重往權謂溫曰若天下太平一主分治不亦樂乎溫對曰夫天無二日土無二王如并魏之後大王未深識天命者也君各茂其德臣各盡其忠將提枹鼓則戰爭方始耳權大笑曰君之誠款乃當爾邪權

與亮書曰丁公挾張

挾音夷念反或作豔臣松之案漢書禮樂志曰長離前挾光曜

明左思蜀都賦擣藻挾天庭孫權蓋謂丁公之言多浮豔也

陰化不盡和合二國唯

有鄧芝及亮北住漢中以芝為中監軍揚武將軍亮卒遷前軍師前將軍領兖州刺史封陽武亭侯頃之為督江州權數與芝相聞饋遺優渥延熙六年就遷為車騎將軍後假節十一年涪陵國人殺都尉反叛芝率軍征討即梟其渠帥百姓安堵

華陽國志曰芝征涪陵見玄猿綠山芝性好弩手自射猿中之猿拔其箭卷木葉塞其創芝曰

嘻吾違物之性其將死矣一曰芝見猿抱子在樹上引弩射之中猿母其子為拔箭以木葉塞創芝乃歎息投弩水中

自知當死

十四年卒芝為大將軍二十餘年賞罰明斷

善卹卒伍身之衣食資仰於官不苟素儉然終
不治私產妻子不免饑寒死之日家無餘財性
剛簡不飾意氣不得士類之和於時人少所敬
貴唯器器姜維云子良襲爵景耀中爲尚書左
選郎晉朝廣漢太守

張翼傳

張翼字伯恭犍爲武陽人也高祖父司空浩曾
祖父廣陵太守綱皆有名迹

益部耆舊傳曰浩字叔明治律春秋遊學京師

與廣漢譚粲漢中李邵蜀郡張霸共結爲友善大將軍鄧騰辟浩稍遷尚書僕射出爲彭城相薦隱士閻立邈等徵拜廷尉延光三年安帝議廢太子唯浩與太常桓焉太僕來歷議以爲不可順帝初立拜浩司空年八十三卒
續漢書曰綱

字文紀少以三公子經明行脩舉孝廉不就司徒辟以高第
為侍御史漢安元年拜光祿大夫與侍中杜喬等八人同日
受詔持節分出行天下貪廉舉劾有罪便收刺史二千石
以驛表聞威惠清忠名振郡國號曰八騶是時大將軍梁冀
侵擾百姓喬等七人皆奉命四出唯綱獨埋車輪於洛陽都
亭不去曰豺狼當路安問狐狸遂上書曰大將軍梁冀河南
尹不疑蒙外戚之援荷國厚恩以嘉堯之姿安居阿保不能
敷揚五教翼贊日月而專為封豕長蛇肆其貪饕甘心好貨
縱恣無狀多樹諂諛以害忠良誠天威所不赦大辟所宜加
也謹條其無君之心十五事於左皆忠臣之所切齒也書奏
御京師震悚時冀妹為皇后內寵方盛冀兄弟權重於人主
順帝雖知綱言不誣然無心治冀冀深恨綱會廣陵賊張嬰
等眾數萬人殺刺史二千石冀欲陷綱乃諷尚書以綱為廣
陵太守若不為嬰所殺則欲以法中之前太守往輒多請兵
及綱受拜詔問當得兵馬幾何綱對曰無用兵馬遂單車之
官徑詣嬰壘門示以禍福嬰大驚懼走欲閉門綱又於門外
罷遣吏兵留所親者十餘人以書語其長老素為嬰所信者
請與相見問以本變因示以詔恩便還請嬰嬰見綱意誠即
出見綱綱延置上坐問於疾苦禮畢乃謂之曰前後二千石
多非其人杜塞國恩肆其私求鄉郡遠天子不能朝夕聞也

故民人相聚以避害二千石信有罪矣爲之者乃非義也忠臣不欺君以自榮孝子不捐父以求福天子聖人欲文德以來之故使太守來思以爵祿相榮不願以刑也今誠轉禍爲福之時也若聞義不服天子赫然發怒大兵雲合豈不危乎宜深計其利害嬰聞泣曰荒裔愚人數爲二千石所侵枉不堪其困故遂相聚偷生明府仁及草木乃嬰等更生之澤但恐投兵之日不免擊戮耳綱曰豈其然乎要之以天地誓之以日月方當相顯以爵位何禍之有乎嬰曰苟救其罪得全首領以就農畝則抱戴沒齒爵祿非所望也嬰雖爲大賊起於狂暴自以爲必死及得綱言曠然開明乃辭還營明日遂將所部萬餘人與妻子面縛詣綱降綱悉釋縛慰納謂嬰曰卿諸人一旦解散方垂過然當條名上之必受封賞嬰曰乞歸故業不願以穢名汗明時也綱以其至誠乃各從其意親爲安處居宅子弟欲爲吏者隨才任職欲爲民者勸以農桑田業並豐南州晏然論功綱當封爲異所過絕故不得俟天子美其功徵欲用之嬰等上書乞留在郡二歲建康元年病卒官時年三十六嬰等三百餘人皆衰杖送綱喪至雒陽葬訖爲起冢立祠四時奉祭思慕如喪考妣天子追念不已下詔褒揚除一子爲郎

先主定益州領牧翼爲書佐建安末舉

孝廉爲江陽長徙涪陵令遷梓潼太守累遷至
廣漢蜀郡太守建興九年爲庾降都督綏南中
郎將翼性持法嚴不得殊俗之歡心者率劉曹
背叛作亂翼舉兵討曹曹未破會被徵當還羣
下咸以爲宜便馳騎即罪翼曰不然吾以蠻夷
蠢動不稱職故還耳然代人未至吾方臨戰場
當運糧積穀爲滅賊之資豈可以黜退之故而
廢公家之務乎於是統攝不懈代到乃發馬忠
因其成基以破殄曹丞相亮聞而善之亮出武
功以翼爲前軍都督領扶風太守亮卒拜前領

軍追論討劉胄功賜爵關內侯延熙元年入爲
尚書稍遷督建威假節進封都亭侯征西大將
軍十八年與衛將軍姜維俱還成都維議復出
軍唯翼庭爭以爲國小民勞不宜黷武維不聽
將翼等行進翼位鎮南大將軍維至狄道大破
魏雍州刺史王經經衆死於洮水者以萬計翼
曰可止矣不宜復進進或毀此大功維大怒曰
爲蛇畫足維竟圍經於狄道城不能克自翼建
異論維心與翼不善然常牽率同行翼亦不得
已而往景耀二年遷左車騎將軍領翼州刺史

六年與維咸在劔閣共詣降鍾會于涪明年正月隨會至成都爲亂兵所殺

華陽國志曰翼子微篤志好學官至廣漢太守

宗預傳

宗預字德豔南陽安衆人也建安中隨張飛入蜀建興初丞相亮以爲主簿遷參軍右中郎將及亮卒吳慮魏或承衰取蜀增巴丘守兵萬人一欲以爲救援二欲以事分割也蜀聞之亦益永安之守以防非常預將命使吳孫權問預曰東之與西譬猶一家而聞西更增白帝之守何也預對曰臣以爲東益巴丘之戍西增白帝之

守比皆事勢宜然俱不足以相問也權大笑嘉其
抗盡甚愛待之見敬亞於鄧芝費禕遷爲侍中
徙尚書延熙十年爲屯騎校尉時車騎將軍鄧
芝自江州還來朝謂預曰禮六十不服戎而卿
甫受兵何也預荅曰卿七十不還兵我六十何

爲不受邪

臣松之以爲芝以年啁預是不自顧然預

芝

性驕傲自大將軍費禕等皆避下之而預獨不

爲屈預復東聘吳孫權捉預手涕泣而別曰君
每銜命結二國之好今君年長孤亦衰老恐不

復相見遺預大珠一斛

吳歷曰預臨別謂孫權曰蜀
土僻小雖云鄰國東西相賴

吳不可無蜀蜀不可無吳君臣憑恃唯陛下重垂神慮又自
說年老多病恐不復得奉聖顏孫盛曰夫帝王之保唯道
陶義道義既建雖小可大勢周是也苟任謀力雖彊必敗秦
頃是也況乎居偏鄙之城恃山水之固而欲連橫萬里永相
資賴哉昔九國建合從之計而秦人卒併六合豈不營輔車
之謀而光武終兼隴蜀夫以九國之彊隴漢之大莫能相救
坐觀屠覆何者道德之基不固而彊弱之心難一乃還遷
故也而云吳不可無蜀蜀不可無吳豈不謫哉

後將軍督永安就拜征西大將軍賜爵關內侯
景耀元年以疾徵還成都後為鎮軍大將軍領
兗州刺史時都護諸葛瞻初統朝事廖化過預
欲與預共詣瞻許預曰吾等年踰七十所竊已
過但少一死耳何求於年少輩而屑屑造門邪
遂不往廖化字元儉本名淳襄陽人也為前將

軍關羽主簿羽敗屬吳思歸先主乃詐死時人
謂爲信然因携持老母晝夜西行會先主東征
遇於秭歸先主大悅以化爲宜都太守先主薨
爲丞相參軍後爲督廣武稍遷至右車騎將軍
假節領并州刺史封中鄉侯以果烈稱官位與
張翼齊而在宗預之右漢晉春秋曰景耀五年姜維
率衆出狄道廖化曰兵不戰
必自焚伯約之謂也智不出敵而力少於寇用之無厭
將何以能立詩云不自我先不自我後今日之事也

咸
熙元年春化預俱內徙洛陽道病卒

楊戲傳

楊戲字文然犍爲武陽人也少與巴西程祁公

弘巴郡楊汰季儒蜀郡張表伯達並知名戲每
推祁以爲冠首丞相亮深識之戲年二十餘從
州書佐爲督軍從事職典刑獄論法決疑號爲
平當府辟爲屬主簿亮卒爲尚書右選部郎刺
史蔣琬請爲治中從事史琬以大將軍開府又
辟爲東曹掾遷南中郎參軍副貳庾亮降都督領
建寧太守以疾徵還成都拜護軍監軍出領梓
潼太守入爲射聲校尉所在清約不煩延熙二
十年隨大將軍姜維出軍至亡水戲素心不服
維酒後言笑每有傲弄之辭維外寬內忌意不

能堪軍還有司承旨奏戲免爲庶人後景耀四
年卒戲性雖簡惰省略未嘗以甘言加人過情
接物書符指事希有盈紙然篤於舊故居誠存
厚與巴西韓儼黎韜童幼相親厚後儼痼疾廢
頓韜無行見指戲經紀振卹恩好如初又時人
謂譙周無當世才少歸敬者唯戲重之常稱曰
吾等後世終自不如長兒也有識以此貴戲
張表有威儀風觀始名位與戲齊後至尚書督
庾降後將軍先戲沒祁太各早死

戲同縣後進有
李密者字令伯

華陽國志曰密祖父光朱提太守父早亡母何氏更適人密
見養於祖母治春秋左氏傳博覽多所通涉機警辯捷事祖

母以孝聞其侍疾則位佛側息日夜不解帶膳飲湯藥必自口嘗本郡禮命不應州辟從事尚書郎大將軍主簿太子洗馬奉使聘吳吳主問蜀馬多少對曰官用有餘人間自足吳主與羣臣汎論道義謂寧爲人弟密曰願爲人兄矣吳主曰何以爲兄密曰爲兄供養之日長吳主及羣臣皆稱善蜀平後征西將軍鄧艾聞其名請爲主簿及書招欲與相見皆不往以祖母年老心在色養晉武帝立太子徵爲太子洗馬詔書累下郡縣逼遣於是密上疏曰臣以險釁風遭閔凶生孩六月慈父見背行年四歲舅奪母志祖母劉氏孤弱躬見撫養臣少多疾病九歲不行零丁孤苦至於成立既無伯叔終鮮兄弟門衰祚薄晚有兒息外無耆功疆近之親內無應門五尺之童榮榮子立形影相弔而劉早嬰疾病常在牀蓐臣侍湯藥未曾廢離建奉聖朝沐浴清化前太守臣逵察臣孝廉後刺史臣榮舉臣秀才臣以供養無主辭不赴命詔書特下拜臣郎中尋蒙國恩除臣洗馬猥以微賤當侍東宮非臣賁首所能上報臣具表聞辭不就職詔書切峻責臣逋慢郡縣逼迫催臣上道州司臨門急於星火臣欲奉詔奔馳則劉病日篤苟順私情則告訴不許臣之進退實爲狼狽伏惟聖朝以孝治天下凡在故老猶蒙矜愍況臣孤苦特爲尤甚且臣少仕僞朝歷職郎署本圖宦達不矜名節今臣亡國賤

俘至微至陋猥蒙拔擢龍命優渥豈敢盤桓有所希冀但以
劉日薄西山氣息奄奄人命危淺朝不慮夕臣無祖母無以
至今日祖母無臣亦無以終餘年出孫二人更相為命是以
區區不敢廢遠臣今年四十有四祖母劉今年九十有六是
臣盡節於陛下之日長報養劉之日短也烏鳥私情願乞終
養臣之辛苦非徒蜀之人士及二州牧伯所見明知皇天后
土實所共鑒願陛下矜愍愚誠聽臣微志庶劉僥倖保卒餘
年臣生當殫首死當結草臣不勝犬馬怖懼之情武帝覽表
曰密不空有名也嘉其誠款賜奴婢二人下郡縣供養其祖
母奉膳及祖母卒服終從尚書郎為河內溫縣令政化嚴明
中山諸王每過溫縣必責求供給溫吏民患之及密至中山
王過縣欲求芻茭薪蒸密牋引高祖過沛賓禮老幼桑梓之
供一無煩擾伏惟明王孝思惟則動識先戒本國望風式歌
且舞誅求之弊所未聞命自後諸王過不敢有煩隴西王司
馬子舒深敬友密而貴勢之家憚其公直密去官為州大中
正性方直不曲意勢位後失荀勗張華指左遷漢中太守諸
王多以為寬一年去官年六十四卒著述理
論十篇安東將軍胡熊與皇甫士安並善之戲以延熙四
年著李漢輔臣贊其所頌述今多載于蜀書是

以記之於左自此之後卒者則不追謚故或有
應見稱紀而不在乎篇者也其戲之所贊而今
不作傳者余皆注疏本末於其辭下可以誦知
其髣髴云爾昔文王歌德武王歌興夫命世之
主樹身行道非唯一時亦由開基植緒光于來
世者也自我中漢之末王綱棄柄雄豪並起役
殷難結生人塗地於是世主感而慮之初自燕
代則仁聲洽著行自齊魯則英風播流寄業荆
郢則臣主歸心顧援吳越則賢愚賴風奮威巴
蜀則萬里肅震厲師庸漢則元寇斂迹故能承

高祖之始北復皇漢之宗祀也然而姦凶懟險
天征未加猶孟津之翔師復須戰於鳴條也天
祿有終奄忽不豫雖攝歸一統萬國合從者當
時雋乂扶攜翼戴明德之所懷致也蓋濟濟有
可觀焉遂乃並述休風動于後聽其辭曰

皇帝遺植爰滋八方別自中山靈精是鍾順期
挺生傑起龍驤始于燕代伯豫君荆吳越憑賴
望風請盟挾巴跨蜀庸漢以并乾坤復秩宗祀
惟寧躡基履迹播德芳聲華夏思美西伯其音
開慶來世歷載攸興

贊昭烈皇帝

忠武英高獻策江濱攀吳連蜀權我世真受遺
阿衡整武齊文敷陳德教理物移風賢愚競心
僉忘其身誕靜邦內四裔以綏屢臨敵庭實耀
其威研精大國恨於未夷

贊諸葛丞相

司徒清風是谷是臧識愛人倫孔音鏘鏘

贊許司徒

關張赳赳出身匡世扶翼攜上雄壯虎列藩屏
左右翻飛電發濟于艱難贊主洪業倬迹韓耿

齊聲雙德交待無禮並致姦慝悼惟輕慮墮身
匡國

贊關雲長張益德

驟騎奮起連橫合從首事三秦保據河漢宗計
於朝或異或同敵以乘釁家破軍亡乖道及德
託鳳攀龍

贊馬孟起

翼侯良謀料世興衰委質于主是訓是謨暫思
經筭觀事知機

贊法孝直

軍師美至雅氣曄曄致命明主忠情發臆惟此
義宗亡身報德

贊龐士元

將軍敦壯摧鋒登難立功立事于時之幹

贊黃漢升

掌軍清節亢然恒常謹言惟司民思其綱

贊董幼宰

安遠疆志允休允烈輕財果壯當難不惑以少
禦多殊方保業

贊鄧孔山

孔山名方南郡人也以荊州從事隨先
主入蜀蜀既定爲犍爲屬國都尉因易

郡名爲朱提太守遷爲安遠將軍庾隆都督
住南昌縣章武二年卒失其行事故不爲傳

揚威才幹欵歎文武當官理任衍衍辯舉圖殖
財施有義有叙

贊費賓伯

賓伯名觀江夏鄢人也劉璋母觀之族
姑璋丈以女妻觀觀建安十八年參李

嚴軍拒先主於縣竹與嚴俱降先主既定益州拜爲
裨將軍後爲巴郡太守江州都督建興元年封都亭
侯加懷威將軍觀爲人善於友接都護李嚴性自矜
高護軍輔正等年位與嚴相次而嚴不與親觀年
少嚴二十餘歲而與嚴通狎如時輩
云年二十七卒失其行事故不爲傳

屯騎主舊固節不移既就初命盡心世規軍資
所恃是辨是裨

贊王文儀

尚書清尚勅行整身抗志存義味覽典文倚其
高風好伴古人

贊劉子初

安漢雍容或婚或賓見禮當時是謂循臣

贊麋子仲

少府修慎

王元泰名謀漢嘉人也有容止操行劉璋時為巴郡太守還為州治中從事先主定益州

領牧以為別駕先主為漢中王用荆楚宿士零陵賴恭為太常南陽黃權為光祿勳謝為少府建興初賜爵關內侯後代賴恭為太常恭柱謀皆失其行事故不為傳恭子玄為丞相西曹令史隨諸葛亮於漢中早天亮甚惜之與留府長史參軍張裔將琬書曰令史失賴玄掾屬喪楊顥為朝中損益多矣顥亦荊州人也後大將軍將琬問張休曰漢嘉前輩有王元泰今誰繼者休對曰至於元泰州里無繼况鄙都乎其見重如此襄陽記曰楊顥字子昭楊儀宗人也入蜀為巴郡

太守丞相諸葛亮主簿亮嘗自校簿書顯直入諫曰為治有體上下不可相侵請為明公以作家譬之今有人使奴執耕稼婢典炊爨雞主司晨犬主吠盜牛負重載馬涉遠路私業無曠所求皆足雍容高枕飲食而已忽一旦盡欲以身親其役不復付任勞其體力為此碎務形疲神困終無一成豈其智之不如奴婢雞狗哉失為家主之法也是故古人稱坐而論道謂之王公作而行之謂之士大夫故邴吉不問橫道死人而憂牛喘陳平不肯知錢穀之數云自有主者彼誠達於位分之體也今明公為治乃躬自校簿書流汗竟日不亦勞乎亮謝之後為東曹屬典選舉顯死亮垂泣三日

臚明真

何彦英名宗蜀郡郫人也事肅漢任安學精究安術與杜瓊同師而名問過之劉璋時為犍為太守

先主定益州領牧辟為從事祭酒後接引圖讖勸先主即尊號踐阼之後遷為大鴻臚建興中卒失其行事故不為傳子雙字漢偶滑稽謔笑有傳子晃

班大化或首或林

諫議隱行儒林天文宣

贊王元泰何彦英杜輔國周仲直

車騎高勁惟其泛愛以弱制彊不陷危墜

贊吳子遠

子遠名壹陳留人也隨劉焉入蜀劉璋時為中郎將將兵拒先主於涪諂降先

主定益州以壹為護軍討逆將軍納壹妹為夫人章武元年為關中都督建興八年與魏延入南安界破魏將費瑤徙亭侯進封高陽鄉侯遷左將軍十二年丞相亮卒以壹督漢中車騎將軍假節領雍州刺史進封濟陽侯十五年卒失其行事故不為傳壹族弟班字元雄大將軍何進官屬吳匡之子也以豪俠稱官位常與壹相亞先主時為領軍後主世稍遷至驃騎將軍假節封綿竹侯

安漢宰南奮擊舊鄉翦除蕪穢惟刑以張廣遷蠻濮國用用彊

贊李德昂

輔漢惟聰既機且惠因言遠思切問近對贊時

休美和我業世

贊張君嗣

鎮北敏思籌畫有方導師穰穢遂事成章偏任
東隅末命不祥哀悲本志放流殊疆

贊黃公衡

越騎惟忠厲志自祇職于內外念公忘私

贊楊季休

征南厚重征西忠克統時選士猛將之烈

贊趙子龍陳叔至

叔至名到汝南人也自豫州
隨先主名位常亞趙雲俱以

忠勇稱建興初官至永安
都督征西將軍封亭侯

鎮南粗彊

輔元弼名匡襄陽人也隨先主入蜀益州既定為巴郡太守建興中徙鎮南為右將軍封中鄉

侯監軍尚篤

劉南和名邕義陽人也隨先主入蜀益州既定為江陽太守建興中稍遷至監軍後

將軍賜爵關內侯卒子式嗣少子武有文與樊建齊名官亦至尚書

並豫戎任任自封裔

贊輔元弼劉南和

司農性才敷述允章藻麗辭理斐斐有光

贊秦子敕

正方受遺豫聞後綱不陳不僉造此異端斥逐當時任業以喪

贊李正方

文長剛粗臨難受命折衝外禦鎮保國境不協

不和忘節言亂疾終惜始實惟厥性

贊魏文長

威公狷俠取異衆人閑則及理逼則傷侵含順
入凶大易之云

贊楊威公

季常良實文經勤類士元言規處仁聞計

文經士元

皆失其名實行事郡縣處仁本名存南陽人也以荊州從事
隋先主入蜀南次至維以爲廣漢太守存素不服龐統統中
矢卒先主發言嘉歎存曰統維盡忠可惜然違大雅之義先
主怒曰統殺身成仁更爲非也免存官頃之病卒失其行事
故不爲傳
孔休文祥或才或臧孔休名觀爲荊州主簿別駕
從事見先主傳失其郡縣文
祥名植襄陽人也隨先主入蜀歷雒陽令南廣漢太守失其
行事子忠官至尚書郎襄陽記曰習植有風流善談論名亞

龐統而在馬良之右子忠亦有名
忠子隆為步兵校尉掌校秘書
播播述志楚之蘭芳

贊馬季常衛文經韓士元張處仁殷孔休

習文祥

國山休風

州國山名南廣漢郡人也好人流言議劉璋時為

從事隨先主征吳軍敗於猇歸遇
害子祐有父風官至尚書右選郎
永南耽思

主定蜀後為州書佐部從事建興元年丞相亮辟為西曹掾

亮南征留邵為治中從事是歲卒
華陽國志曰邵兄懿字

漢南劉璋時為牛鞞長先主領牧為從事正旦命行酒得進

見讓先主曰振威以將軍宗室肺腑委以討賊元功未效先

寇而滅貌以將軍之取鄙州甚為不宜也先主曰知其不宜

何以不助之懿曰匪不敢也力不足耳有司將殺之諸葛亮

為請得免久之為犍為太守丞相參軍安漢將軍建興六年

亮西征馬謖在前敗績亮將殺之懿諫以秦赦孟明用霸西

戎楚誅子玉二世不競失亮意還蜀十二年亮卒後主素服

發哀三日懿上疏曰呂祿霍禹未必懷反叛之心孝宣不好

楊戲

為殺臣之君直以臣懼其偏主畏其威故幾萌生亮身杖疆
兵狼顧虎視五大不在邊臣常危之今亮隕歿蓋宗族得全
西戎靜息大小為慶

盛衡承伯言藏言時

盛衡名勳承伯名齊皆巴

後主怒下獄誅之

西閬中人也勳劉璋時為州書佐先主定蜀辟為左將軍屬
後轉州別駕從事卒齊為太守張飛功曹飛貢之先主為尚
書郎建興中從事丞相掾遷廣漢太守復為飛參軍亮卒為
尚書勳齊皆以才幹自顯見歸信於州黨不如姚弋仲字子
緒亦閬中人先主定益州後為功曹書佐建興元年為廣漢
太守丞相亮北駐漢中辟為掾並進文武之士亮稱曰忠益
者莫大於進人進人者各務其所尚今姚掾並有剛柔以廣
文武之用可謂博雅矣願諸掾各希此事以屬其望遷為參
軍亮卒稍遷為尚書僕射時人服其

孫德果銳

孫德名福梓德名福

貞誠篤粹延熙五年卒在作贊之後

也先主定益州後為書佐西充國長成都令建興元年徙巴

西太守為江州督楊威將軍入為尚書僕射封平陽亭侯延

熙初大將軍蔣琬出征漢中福以前監軍領司馬卒

益部

者舊雜記曰諸葛亮於武功病篤後主遣福省侍遂因諮以
國家大計福往具宣聖旨聽亮所言至別去數日忽馳思未
盡其意遂却騎馳還見亮亮語福曰孤知君還意近日言語

雖彌日有所不盡更求亦決耳君所問者公談其宜也福謝
前實失不諮請公如公百年後誰可任大事者故輒還耳乞
復請蔣琬之後誰可任者亮曰文偉可以繼之又復問其次
亮不吝福還奉使稱旨福為人精識果銳敏於從政子驥字
叔龍亦有名官至
尚書郎廣漢太守
偉南篤常
偉南名朝永南兄郡功曹舉孝廉臨邛令入為別駕從事隨先主東征吳章武二年卒於永安益部耆舊雜記曰朝又有一弟早亡各有才望時人號之李氏三龍華陽國志曰羣下上先主為漢中王其文朝所造也臣松之案耆舊所記以朝邵及早亡者為三龍貌之狂直不得在此數

德緒義彊志壯氣彊

德緒名祿巴西安漢人也先主定益州為郡從事牙門將建興

三年為越雋太守隨丞相亮南征為蠻夷所害時年三十一弟衡景耀中為領軍義彊名士廣漢郡人國山從兄也從先主入蜀後舉孝廉為符節長遷牙門將出為宕渠太守徙在犍為會丞相亮南征轉為益州太守將南行為蠻夷所害

濟濟脩志蜀之芬香

贊王國山李永南馬盛衡馬承伯李孫德

李偉南龔德緒王義彊

休元輕寇損時致害

休元名習南郡人隨先主入蜀先主東征吳習為領軍統諸軍大敗

於號亭

文進奮身同此顛沛

文進名南亦自荊州隨先主入蜀領兵從先主征吳

與習俱死時又有義陽傳彤先主退軍斷後拒戰兵人死盡吳將語彤令降彤罵曰吳狗何有漢將軍降者遂戰死拜子儉為左中郎後為關中都督景耀六年又臨危授命論者嘉其父子奔出忠義蜀記載晉武帝詔曰蜀將軍傳儉前在關城身拒官軍致死不顧儉父彤復為劉備戰亡天下之善一也豈由彼此以為異儉息著募後沒入奚官免為庶人

患生一人至於弘大

贊馮休元張文進

江陽剛烈立節明君兵合遇寇不屈其身單夫

隻役隕命於軍

贊程季然

季然名畿巴西閬中人也劉璋時為漢

關中巴西太守龐義以天下擾亂郡宜有武衛頗招
合部曲有議於璋說義欲叛者璋陰疑之義聞甚懼
將謀自守遣畿子郁宣百索兵自助畿報曰郡合部
曲本不為叛雖有文牒要在盡誠若必以懼遂懷異
志非畿之所聞并敕郁曰我受州恩當為州牧盡節
汝為郡吏當為太守効力不得以吾故有異志也義
使人告畿曰爾子在郡不從太守家將及禍畿曰昔
樂羊為將飲子之羹非父子無恩大義然也今雖復
羹子吾必飲之義知畿必不為已厚陳謝於璋以致
無咎璋聞之遷畿江陽太守先主領益州牧辟為從
事祭酒後隨先主征吳遇大軍敗績泝江而還或告
之曰後追已至解船輕去乃可以免畿曰吾在軍未
曾為敵走況從天子而見危哉追人遂及畿船
畿身執戟戰敵船有覆者眾大至共擊之乃死

公弘後生卓爾奇精天命二十悼恨未呈

贊程公弘

弘名祁季然之子也

古之奔臣禮有來徧怨與司官不顧大德靡有
匡救倍成奔北自絕于人作笑二國

麋芳士仁郝普潘濬

麋芳字子方東海人也為南郡太守士仁字君義廣

陽人也為將軍住公安統攝關羽與羽有隙叛迎孫權郝普字子太義陽人先生自荊州入蜀以普為零陵太守為吳將呂蒙所譖開城詣蒙潘濬字承明武陵人也先主入蜀以為荊州治中典留州事亦與關羽不穆孫權襲羽遂入吳普至廷尉濬至太常封侯

益部耆舊雜記載王嗣常播衛繼二人皆劉氏
王蜀時人故錄于篇

王嗣字承宗犍為資中人也其先延熙世以功
德顯著舉孝廉稍遷西安圍督汶山太守加安

遠將軍綏集羌胡咸悉歸服諸種素桀惡者皆
來首降嗣待以恩信時北境得以寧靜大將軍
姜維每出北征羌胡出馬牛羊氈毼及義穀裨
軍糧國賴其資遷鎮軍故領郡後從維北征爲
流矢所傷數月卒戎夷會葬贈送數千人號呼
涕泣嗣爲人美厚篤至衆所愛信嗣子及孫羌
胡見之如骨肉或結兄弟恩至於此

常播字文平蜀郡江原人也播仕縣主簿功曹
縣長廣都朱游建興十五年中被上官誣劾以
逋沒官穀當論重罪播詣獄訟爭身受數千杖

肌膚刻爛毒痛慘至更歷三獄幽閉二年有餘
每將拷掠吏先驗問播不荅言但急行罰無所
多問辭終不撓事遂分明長免刑戮時唯主簿
楊玩亦證明其事與播言同衆咸嘉播忘身爲
君節義抗烈舉孝廉除鄴長年五十餘卒書於
舊德傳後縣令潁川趙敦圖其像贊頌之

衛繼字子業漢嘉嚴道人也兄弟五人繼父爲
縣功曹繼爲兒時與兄弟隨父遊戲庭寺中縣
長蜀郡成都張君無子數命功曹呼其子省弄
甚憐愛之張因言宴之間語功曹欲乞繼功曹

即許之遂養爲子繼敏達夙成學識通博進仕
州郡歷職清顯而其餘兄弟四人各無堪當世
者父恒言已之將衰張明府將盛也時法禁以
異姓爲後故復爲衛氏屢遷拜奉車都尉大尚
書忠篤信厚爲衆所敬鍾會之亂遇害成都
評曰鄧芝堅貞簡亮臨官忘家張翼凡姜維之
銳宗預禦孫權之嚴咸有可稱楊戲商略意在
不羣然智度有短殆罹世難云

鄧張宗楊傳第十五

蜀書

國志四十五